

列女二

節孝爲婦德之大端而前朝坊表祠宇皆惟目以節孝則幾若具體矣今最吾邑古今節孝于此又就其中以史法之義類類例求之則同爲節孝猶未可一槩論也其節孝兼全並能教子者在明則有陳本初妻魏氏州人年二十二而寡養舅姑撫幼字以孝慈聞子後成立爲請旌表如例黃廷桂四在清有顏廷璋妻黃氏定遠人父萬暄以拔貢任高縣教諭初在襁褓萬暄卽以字於合州城內舉人顏熙之次子廷璋及笄于歸生子女各一廷璋方以諸生有聲庠序間銳志進取溺苦于學黃又時勉勗之廷璋遂以勤勞病死黃年始二十七也內外家皆士族固無議再醮者而顏氏故清貧夫死翁衰獨以一身肩承啟之責亦殊非易易事黃則于事畜外覘候堂上顏色務得其歡心暇則課孤子昀讀書不懈翁姑旣終乃爲昀娶于彭衣服酒漿之事皆黃一力任之未幾昀卒彭年十九遺子其重姑婦瑩瑩形影相弔幾不知人世間有含

合川縣志卷五十一 列女二

一

飴弄孫之樂然均矢志艱貞相與操持田業有進無退其重亦以成立族人兩賢之焉時熙弟三女適郭氏者其夫炳娘亦方冠而死撫遺子鴻鳧備極恩勤黃憫其無依欲迎與同居顏謝不許而自操家政井井有條教育二子皆能有立戚黨猶罕見其面蓋謹嚴守禮綽有士風云

張乃孚合州志西里采訪員來稿

有蔡方升妻朱氏州永里南壩人其母家居銅梁縣

幼字方升年十八于歸甫九月方升沒無子朱誓死靡他孝養衰姑能得其歡心姑偁之賢孝人無間言姑以老不治事命朱主家政家法甚肅四十以內罕有見其面者姑年九十七卒朱後撫從子仲瑛爲嗣遂執父道督課綦嚴仲瑛因以入泮嘉慶十七年仲瑛上朱事于朝爲請旌奉旨允准道光四年建坊于書院街舉人李廷謨爲之贊曰九月破圓鏡百年抱冰心弟有子母無子夫死安得死母無子弟有子繼嗣斯可矣見姑如見翁作婦亦作子全孝全節古所偁母之生平具于此朱年七十二卒守節五十二年坊今存孫新周恩貢生永里采訪員投稿有劉仕彥妻范氏州人年二十四夫卒時祖翁姑年皆耄耄孀姑常病卧于牀范事老撫幼備極勤劬夫弟三人咸爲授室子後入邑庠族黨咸矜式

之嘉慶十七年旨准旌表同時有李應貴妻王氏嘗剝股療夫病不愈  
衰翁在堂諸孤待哺而家貧甚王以女紅度日事親撫子生事葬祭皆  
于十指乎取之後長子入邑庠三子列成均人以爲能繼應貴之志以  
應貴故庠生也守節六十二載詔予旌表有汪永佑妻陳氏年二十七  
寡事翁姑得其歡心撫子成立又彭鋤妻刁氏年二十二寡事翁姑盡  
禮教子遊庠子卒又撫幼孫成立年逾八十而終又劉卓齋妻范氏夫  
歿遺二子上事祖父母及姑苦節三十餘年與仕彥妻內外家姓同事  
略大同或卽一人一事而名字傳異也寇宗重慶府志有雷正發妻王氏東里  
王家大溝人年十七歸正發正發故興里羊頂山下儒生也性好學而  
多病父國聖慮其不壽更納妾彭氏生子正興特相鍾愛彭恃寵生忌  
以家田百畝難獨得因國聖嗜酒輒乘間進讒謂讀書無益宜務農遽  
與正發田使躬耕雖農忙勿許僱工而豐歉責收如一正發不能辨形  
枯骨立彭譖以爲孀迫遣別居正發伯父國瑞勸止之彭弗應國瑞怒  
攜正發養病其家而家內之虐以起始僅及王至是則其嫡梁暨孫輩  
皆不免矣長孫甫受書使廢讀而牧正興則優遊學校無所事事梁不

平與辯乃受毆辱憤氣死正發聞耗匍匐奔喪及門暴病彭不許入室  
王痛切所天負入灰屋而絕乃號哭跪翁前乞賜衣冠厚葬翁爲惻然  
彭曰汝能嫁衣冠有出王曰葬在速嫁在緩請先謀葬可乎彭陽贊而  
陰嫉之葬後逼嫁者數王懇終三年喪翁念王素孝卽菽水一端無論  
半夜崇朝皆咄嗟可辦蓋王探翁性所喜預磨細豆瓣備妥諸應用物  
須用時倉卒立就以類推其他之先意承志可知矣一旦去之慮于  
已不便故彭雖絮聒猶不動也久之乃議分炊以石果河薄田艸屋畀  
王母子往居自耕而食坐宅腴田大土作養老及正興婚配費王咸諾  
弗爭迨居數月突人定後廚房火起王覺呼眾撲滅而竈冷無烟莫知  
火之所從起翁任修理戒勿問後母子往省彭彭予以食物翁輒使彭  
先嘗彭意乃少沮王尋令長子大德就塾雞初唱起讀再唱芸菜三唱  
擔菜入城喚賣已刻上課畢則樵薪而歸午後耕牧夜作篋工王紡績  
伴之次大廷三大會環列聽訓非三更不止翁亦時往來其間王母子  
雖饑飽不常猶相安焉旣而大德輟讀學習于某錢店有能名彭思與  
之競則餽翁加押五百金爲釀酒業使正興主之翁老不治事未久折

閱且盡翁悔曰彭氏誤我遂憂憤卒既卒彭揚言逋責多卽售產償所餘金盡乾沒入已私予正興爲鹽貿初頗有所獲再往則船遭風覆傾橐無遺而大德及二弟俱學賈有成稍稍獲贏饒足衣食矣彭轉責王復分產王曰久欲迎養母不願也此乾田薄土卽叔能守何靳焉彭曰否願得見金有之王奉百金爲壽彭乃不復言然正興固不習商金到手輒散又婦亡子死頓卽孤窮彭悲忿交集病大作王往省彭自怨艾曰向非人復何言語未卒氣塞胸死王出金厚葬之並爲之服別贈正興五十金使營小貿是時大德弟兄商業日隆隆上雷仁和號名譽四達歲入有餘更置田宅作富人居而正興落魄甚王憐之招來家終養因訓諸子曰正興汝季父今差得所汝明氏姊家未有起色盍思所濟之凡人無錢時苦不能聚有錢時苦不能散散之有道家可長保勉思吾言庶不再有草廬啼饑號寒時也諸子謹受教遂勑立十全會獨買黑巖頭田土作義塚請鹽務罰款入實惠局添養孤貧全貞修洛陽門起至漕壩大路皆王發起之由爲多光緒某年卒年六十三奉旨旌表入祠如例

模範小學校員  
劉文樞訪稿

有袁正富妻鄧氏州東里獅灘場人年十九歸

合川縣志卷五十一 列女二

三

正富同心黽勉孝養孀姑無違禮姑以爲賢數年正富卒遺子世松榮瑩子立與衰姑三人形影相弔而已鄧念不自強立家且不保姒續何有乃躬自勤劬無敢暇逸勞力所得非養親教子不輕用也姑歿哀毀盡禮喪葬諸費稱所有而出人無間然世松成立家益饒裕追溯原始非鄧苦守勤力曷克有之光緒中卒年七十七袁大敬妻王氏州東里獅灘場人年十六歸大敬翁姑已逝獨祖姑存王代姑奉婦職事事得祖姑歡心祖姑謂逾于其姑在也逾年伯叔分炊祖姑願就王養適大敬病人頗以爲難王慨然身任朝夕侍祖膳視夫疾服食藥餌之餘兼理家政布置井井有條內外安之又年餘大敬卒王慟不欲生念遺腹在懷勉起支持喪事殯葬如禮期有子承宗祧可對亡夫于九原也比免身乃女耳計無復之卽撫堂弟七歲子光印嗣以養以教至于成立而王年亦既老矣清光緒十二年有司以其事聞得旨旌表宣統元年卒年八十四袁大恆妻李氏州東里獅灘場人袁銀山冢婦也于歸時銀山已歿逮事姑左蒸又克諧李年三十夫大恆卒遺子光容九歲李以姑在不敢過哀傷老人心惟撫教孤兒無所姑息冀有子克家也光

容少長爲娶婦沈生子繼安而光容卒才二十八耳李上奉孀姑下撫寡媳仰承俯注恩禮交施沈亦賢孝祖孫四世對影七人無所怨咨冰霜凜凜益相與有成焉清光緒十二年李沈守節年例已符當事請于朝並得旌表又二年卒年七十九其年沈亦卒年五十九袁大平妻鄧氏則大恆之胞弟婦李其嫂沈其從子婦也性和順嫻姆教年十六歸大平時大平病久氣息奄奄如鄧旣恨不逮事阿翁又懼夫病不起已失所天特加意飲食醫藥動靜起居凡力所能爲靡不盡心調治更朝夕焚香默禱篤矢回天之忱用以上慰姑心俾無他慮未幾大平病有起色堂上人于是喜得佳婦矣逾年生子光寰又三年大平卒生遺腹女一鄧遂屏絕鉛華自甘淡泊勞身苦志眎前有加至子成家姑終養女適人始稍自屏寬閒頤養天和光緒七年卒年五十五拔貢生李遂根銘其墓後同沈李並旌一時僞爲一門三節袁光蕊妻曾氏大恆族子婦也性溫惠有志操于歸光蕊相夫事姑無失禮者生子繼高女一而光蕊卒曾年方二十九勵節撫孤嫁子取女一力摒擋不豐不儉人以爲宜家事亦卒無損無何繼高又夭繼高妻亦曾氏年十八來歸十九生

合川縣志卷五十一 列女二

四

子昌瑞二十而孀與姑曾相守家僅粗給以夫喪負累幾不保朝夕曾惟袁氏兩世祇此懷抱中物不絕如縷少失算卽不免凍餒將何自存更有蹉跌則袁氏之祀不斬而斬如重孀何乃隨姑操作勤勞克身約已量歲出入務有贏餘不十年責清款裕號爲小康昌瑞亦粗有立光蕊妻曾以清光緒十二年旌表宣統元年卒年六十三繼高妻曾又一年卒年四十四光蕊妻曾貫之女也貫之故儒童光蕊妻行事亦微有儒風例得附書東里采訪員 袁權來稿有潘大斌妻劉氏州西里人年十五歸大斌生子二女一閱八歲大斌故劉事孀姑張先意承志得其歡心張謂之曰汝用心至此苦汝矣願他年子孫事汝亦如汝今日之事吾卽所以報汝也其撫子女最慈自孩提至成立衣服飲食疾痛疴痒無所不周到然偶不若于道則譴訶立至甚乃扶之不少貸嘗教子開龍等曰汝曹坐憑先業食用優游當念朱柏廬言一粥一飯來處不易半絲半縷物力維艱勿動輒狼籍謂區區無妨事也開龍等受教後皆各自成立如劉言卒年四十四守節十有九年潘氏支譜有辛吉安妻謝氏州城內人年十七于歸又七年夫故無子謝矢志守節代夫奉親而翁老不治

事姑性嚴厲多病恆展轉牀蓐閒凡飲食衣服湯藥梳洗轉動痛癢抑搔之事謝皆身任之朝夕服侍未嘗厭倦或小有不合則變色罵詈甚乃扶擊之不少恕謝和顏承受或長跪請罪乃已亦未一怨言也前後二十餘年始終如一人以爲難久之乃撫從子承祀謝初未讀書而教子有方恩義兼盡頗有柳母歐母遺意待諸姪女亦如親生暇輒誨以烹飪縫紉鍼黹諸女紅娓娓至夜不休聽者亦樂與親近焉年五十四卒苦節三十一年

興里采訪  
員來稿

有吳秀彬妻張氏州西里錢塘鎮人文生

張居光姊也歸秀彬時年十七二十夫故遺子仁周張特躬甚謹事翁姑以禮教孤子以義處伯叔先後恭敬謙和無一閒言前後十餘年操勞過甚病將不起語仁周邀其伯叔嫂孀至泣曰吾一生艱辛望此兒成器耳今不及待矣懇伯叔嫂孀爲教之成立庶不負我苦節也眾許諾遂逝年三十五定遠拔貢蔣培元挽以詩云上承色笑下扶持棘手勞勞無了期桐到半枯蕉半死回頭猶念趙孤兒紀其實也吳仁亮妻李氏州西里錢塘鎮人十八嫁二十四寡矢志守節孝事翁姑教養二子雖母道而有父道存焉道光二十六年鄉人哀其苦節采其事略入

合川縣志卷五十一 列女二

五

邑志以旌表之卒年六十一定遠文生張碧薈爲詩弔之云百兩迎歸未數年望夫石上淚涓涓立心不共寒衾冷矢志眞同寶璧堅對影呱呱存似續一生皎皎任熬煎天章遙賁旌門寵握管應添邑志篇實則張志在前程志亦未收錄今采補于此以副其初議云有吳公文妻張氏夫故時年二十七對靈自誓之死靡他上事翁姑親操井臼下撫二子教養成立年六十卒苦節三十五年蔣培元有□□□詞紀其事云掩鸞釵嘆王郎早去漠漠□□□雜佩難留綦巾猶在只愁鬢髮霜催幸賴是延陵餘德邀天章紫詔賀鸞回史補女箴書編彤篋更築懷清臺尤羨佳兒崛起有荀龍高格辭鳳清才聖善常懷父書能讀修成奇福應該只天上瓊花易返誤春風不向廣陵開徒惹單鳧淚漬醒枕難措蔣于詞無所解取以參證事實非謂列之詞品也

西里采訪  
員投稿

有李肇

賢妻何氏州人年二十歸李氏翁姑多病何典衣飾奉湯藥以養之翁姑繼逝夫亦旋故遺子文概尙幼撫之以成立焉

寇宗重  
府志

有周錫章妻

雷氏安居人父樹春增生周年十八來歸于周周爲州來里之渭沱場人翁占元亦庠生也錫章時亦援例國子監生內外家皆士族雷自爲

新婦以至老死禮無違者同治十三年錫章卒年方二十八遺子三皆幼雷矢志苦節上奉翁姑養生送死克盡其禮下撫諸孤課耕教讀一主于嚴嘗以出自書香歸于黌俊而諸子乃無入膠庠者殊有不類之恨甚望孫輩或能式穀似之及光緒三十三年孫純欽由合州中學申送成都工業學校名位與廩增附生略等雷喜以爲此亦謝鳳一毛也其年卒年六十一苦節三十三年純欽後以四川招討軍參謀委任潼南縣知事來里採訪員投稿有易光怡妻唐氏州來里雙財門人西里歲貢唐協恭之从妹也文學張鵬翔爲之傳曰孺人秀外惠中方六七歲時諸兄舉曹大家女誡及劉向列女傳爲之講說卽能記其大略年未及笄歸易君和修伉儷甚篤不失如賓之敬光緒十年甲申和修以疾卒遺襁褓子顯江孺人時年二十有二舅海梁公與姑徐孺人痛其子之早喪恆相對流涕孺人恐增其悲不敢晝哭強詞以解之指抱中子曰有此一脈在死者必不死矣舅姑爲之稍慰夜輒伏枕飲泣淚盡成血家人初未之知也廚中烹飪固有專司而舅姑一飲一食必親爲調適內外諸務處之必當以故常得舅姑歡然靡他之志久而愈堅春花秋月漠然

合川縣志卷五十一 列女二

六

不動無故不出戶庭非至親罕有見其面者蓋此心如古井水已風波不復起矣是以形跡無嫌猜譏不啟鍾禮郝法兼而有之下撫遺孤保護甚至及其成立猶視若嬰孩然愛之以德不以姑息偶有過愆必反覆誥誠使之悔悟乃已亦絕不出惡聲故顯江年未弱冠已純謹如老成人先是海梁公嘗謂顯江曰吾族以節孝稱者多如汝母者少他日必爲請旌庶不負其苦衷顯江識之弗敢忘以明年壬子孺人五旬今歲特爲之請旌遵祖命也和修光怡字海梁名開治見易氏譜易氏族譜其純以節見者在明則有何溥祐妻陳氏合州人明中葉歸溥祐年二十二夫死無子父母憐其少且家貧欲嫁之陳以死自誓因勤紡績藉度朝夕年七十七壽終事聞旌表黃廷桂通志在清則有周世英妻范氏合州人范年二十世英病篤范刲股和藥以進得小愈逾數月卒范哀毀絕食誓以身殉親族勉以事親撫孤爲孝乃進膳已而翁姑以貧不自存欲奪其志已許聘矣范聞持不可強之遽跪翁姑前自白曰兒死尙有孫新婦勤紡績猶能供菽水若去復何倚邪因伏地泣血亟自經小姑覺而解之翁姑感其孝亦止不復強范執婦道維謹養葬盡禮苦

節五十八年其從子欲爲請旌范謝曰守節婦人職耳求顯何爲遂不許卒年七十八○張乃孚合州志有苟文烜妻鄭氏順慶府廣安州人父參以進士官江西太和縣知縣母王氏刑部侍郎安居王汝璧妹內外家門第鼎盛一時豔倂鄭生太和縣署中五六歲時隨父兄誦經史弄筆墨不樂與女伴嬉戲參賞異之嘗曰是兒貞靜他日當以節孝著未幾參致政歸里歿於渝城舟次抵家後母亦卒鄭雖幼自傷孤苦哀毀踰於成人見者莫不感泣年十九歸苟又烜苟故合陽顯族簪紱蟬聯文烜父桓時由永寧司訓遷劍州學博文烜夫婦與兄某嫂鄭挈兩幼姪隨任侍起居兄某課至嚴動以夏楚從事兩兒股時無完膚鄭哀之恆於燈月下陰爲泣治創痕撫慰良殷兄某聞之亦爲霽威文烜性頗傲鄭委曲匡救卒成謙退無何以試事歸里抵家數月卒鄭聞訃慟絕數日不進飲食誓以身殉翁桓曉以大義謂立後撫孤非異人任奈何欲以一死塞責鄭聞矍然始從容矢柏舟志歸立兄子培岷爲嗣撫愛如己出時年僅二十有二居有頃翁桓計偕北上姑李寢疾鄭躬侍湯藥寢食俱廢李太孺人感之臨歿謂曰吾茲累汝吾願汝子孫之孝汝也已

合川縣志卷五十一 列女二

七

而桓亦卒於雲南任所喪歸鄭哀慟慘怛視居父母喪時有加既葬其家議析箸而兄某適喪偶遺襁褓女鄭代爲撫育視同所生其後此女竟不復歸鄭爲相攸遣嫁費累不辭女家貧落更以時助其不給子亦能體母意無於吝非鄭之賢而能若是歟初鄭喪母時舅氏侍郎公爲安徽巡撫憫其失恃攜至撫軍署矜錢夫人尙書陳羣女也子視之因益得涉獵經史逮倂未亡人教嗣子甚勤每漏三四下猶時聞其課讀聲也晚教其孫亦然年屆七十猶喜演說古來忠孝節烈事偶姻婭讌集女媳孫婦環侍鄭敘述原委摹繪聲情斐亶不倦可以覘其素志矣其甥陳令德之辭也令德岳池歲貢著有鏡心堂文稿苟氏族譜程業修合州志同時有貢生苟文璧妾楊氏西里白沙壩人文璧歿時年二十三遺二女無子有嫡子培勳楊撫如己出既娶妻生子旋卒楊又撫幼孫鍾祿鍾俊成立後皆入邑庠楊猶及見之守節四十一年壽終蓋文烜同族而屬疏者也程業修合州志有胥倫妻何氏州人訓導何琬女也○森楷案州舊選舉志舉貢及仕進類無何琬名而歲貢類有何璉下注云儀隴縣訓導疑卽一人未諗琬璉字誰定爲得耳倫爲邑庠生有文名琬愛其才以女妻之及笄于歸倫以志切進取勤學致疾而死何時年二

十六家又甚貧或問其意何誓不二嫁且以翁姑在堂舍之他適于心既不安又何以對死者于地下家雖貧苟勤力將事人定勝天當不憂餓死也或慚而退何由是晝事針紝夜以紡績繼之饗殮尙不缺乏翁姑繼沒喪葬盡禮苦節五十九年壽終張乃孚合州志有謝天佑妻張氏州人年二十歸天佑甫半載夫卒有遺腹子永祥弟兄欲奪其志張嚼指自誓還依其父母居斷酒長齋獨處一廬足不履闕雖至親罕見其面惟勤勞紡績撫孤成立苦節三十二年卒尙未請旌張乃孚合州志有李秀智妻曹氏州興里人年二十于歸生子忠成尙在襁褓而滇匪亂作秀智被擄去不知所終或云至大足之東關見殺道遠傳聞莫能知其審也風聲至李所李痛欲身殉不食者累日矣翁姑諭之曰兒生死不可知必相從地下我二人不足念如呱呱者何曹不得已乃誓死相守起治事如初當是時李家中落而食指濟濟親族間有勸之早爲計者曹不一答飲泣而已宅外有林竹頗茂密曹哀痛無聊時輒走入其中大哭以攄懣血淚涔涔數行下跡沾竹不脫或爲之枯鄉人有見之比之湘妃竹淚云後子成立以壽終來里採訪員投稿有李旋隆妻張氏福建永

合川縣志卷五十一 列女二

八

定縣人幼從其父泮生營貿來合受旋隆聘及年十七于歸生子三旋隆歿張年方二十七痛不欲生其父苦勸諭之乃茹荼守志以紡績自給勤勞不懈薄有積蓄以供三子讀書之費後皆成立張亦以壽終守節五十餘年張乃孚合州志有李尙賢妻苟氏州人年二十四夫故無子或人

憐其孤苦勸令改適苟答曰家貧親老何忍舍之願矢志奉親以終二老餘年族人哀其志爲撫堂兄子耕讓承祧苟躬自撫育以迄成人恩意甚篤光緒初年五十八存程業修合州志有吳定廷妻顏氏州西里錢塘鎮

人年十六適定廷踰年定廷以水死則以定廷志進取甚切從師于明月鄉學因赴州試至丈八灘舟破援拯無及故及難也報至顏仰天號哭急至所溺處覓檢遺骸倉卒不能得痛欲身殉從者苦勸止之卒獲骨以歸撫兄長子高韻爲嗣養教兼施寬嚴互用高韻遂以成人近植桑數千株命其經理勿預外事固潮流所趨亦前車之鑒也見年五十猶操作不息殆習勤成性與

有曹澤茂妻卿氏州東里獅灘場人

年十七歸曹氏家微也生二子而澤茂歿卿年甫二十三無以給朝夕



二子累之雖欲自食其力亦覺有所難能或勸其易姓圖存卿曰婦人從一而終義也如若所云豈渠父在日有以自給乎等貧耳勉力圖之或有免凍餒之一日不必其改節也且貧富有命苟嫁而仍貧或且死復奈何誠不若義命自安耳遂不嫁以紡績自供粗淡僅足兒少長教之執業各粗能自立皆有室家矣兒方謀竭力奉養酬其勞苦而卿竟以民國七年壽終年六十有一苦節三十七年時又有與卿里居近而志事同者爲黃沙曹鄧可友妻王氏年十六歸可友又九年而寡遺一女無子家赤貧無朝夕資堂上姑老不事事惟恃子傭力以活子死不不知所爲或勸嫁婦可得錢爲終老計以商之王王不肯願樵薪鬻菜以自給不足則傭力繼之姑亦不强王遂鋤地種蔬登山拾橡分一日爲朝午晚顧景從事晷刻不踰其蔬則送之附近煤窰易米而返薪則以供炊爨間亦得錢輒市肉歸爲姑壽姑亦安之不覺其艱窘也及姑老死以禮葬祭女長適人撫一子亦成立今粗能息肩云年近五十見存

東里采訪  
員來稿

有唐俊三妻張氏州來里七間橋人年十七于歸閱二年寡

無子張自嗟薄命投繯以殉家人見而解之再投再解遂不得死其姑

合川縣志卷五十一 列女二

九

王恐無以慰其意終不能安之也乃同堂協商所以處之其伯叔先後皆以張平日事親謹處眾和有賢淑聲皆願弟兄行中無論何人有第二子卽以承祧久之乃以其夫第四弟子永軒爲嗣周歲斷乳卽自撫之今五十餘年永軒亦抱孫矣子婦男女濟濟一堂張顧而樂之謂初不意有此日也民國七年二月無疾而終年七十四

里采訪  
員投稿

有陳遠

澍妻劉氏州城內人年十四于歸閱七年夫故無子又二年翁炳煊自中部縣知縣告歸聞劉病問其故則以澍家人計欲嫁之劉憤而病作也姑王憐其志密詢究欲何爲對言願侍奉高堂終得爲亡者續禋祀足矣王故有嗜好方苦僕婢不足使聞其言則大喜爲言炳煊姑留試焉由是竭力奉親兼撫孤女晝襄家務夜役烟燈無一缺點如是八年翁姑皆喜乃命以其中兄子世勤爲遠澍嗣而劉母之劉意遂安後翁姑繼逝各房分炊加以水災諸須布置劉內督家政外應親賓事無巨細一身肩之不以累及世勤惟責其入學奮志而已世勤旣長爲娶于楊久之無育復爲納側室李民國元年事也比四年李生子■而劉已于三年冬卒不及見之矣計享年四十有四守節二十三年世勤每

道其母之賢勞及其望孫之切未嘗不淒然欲淚也興里訪有王子俊妻曾氏州城內人子俊故營商業家亦小有及曾于歸商賈已停勢漸凋落子俊亦病失血無力支撐日夜焦灼越至八載病遂危篤其年竟卒曾年方二十四也遺子女各二餘無所有喪葬之費皆曾父廉泉資之事訖仍無以舉火或說曾宜善自爲謀不者且作涸鮒死曾毅然答以必守人定勝天雖貧何害乃因廉泉之招遷與同居已仍勤作針黹夜以繼日得錢隨寄送翁姑處值年節則備購食用各物齎回已亦攜諸子女還家團聚一堂以適翁姑之意及翁姑相繼逝獨力營葬盡禮盡哀觀者偁爲孝見子女漸長成雖貧不久而曾年已五十六矣西里采訪

員投稿

其純以孝見而庸行者在明無聞已下明無聞者不復著此句特發凡于此在清則有李本

妻蔡氏州永里人蔣編修璧方有李孝婦家傳曰蔡父方晉翁文敏皆邑庠生方晉夫婦早卒孝婦歸李氏才十二歲時祖姑尙存高年多病常困牀褥量狹少容服役者動輒獲咎顧獨喜孝婦每呼至榻前撫摩再四不欲片刻離文學公夫婦護背承歡孝婦先有力焉然文學公性

合川縣志卷五十一 列女二

十

嗇鹽米瑣碎無不經心姑周氏則落落大方不屑以錙銖介意與庶姑任氏皆服食必精且各溺愛其女已嫁必欲常見并外孫子女頻頻去來衣履稍舊必爲整新文學公雖不能禁意頗非之孝婦委曲調和姑所欲爲刀尺鍼綫咸以責之孝婦晝恐顯觸翁怒每深夜挑燈翦裁縫紉翁又以無端虛費膏燭相誚讓孝婦則掩蔽燈光常通宵不輟以順姑意文學公旣以婦賢可託家事孝婦因得左右彌縫姑與庶姑各行其意不逢文學公怒矣文學公晚年病痰夜則增劇孝婦佐夫本侍奉藥餌備極殷勤一日文學公謂其姑曰婦未眠乎吾每夜急嗽沸湯立至若安得有就寢時也問之果然後姑又病氣痛需人撫熨瘦骨孱孱物皆不受孝婦掌烘油熱時爲按摩無冬夏晦明咸如一日翁年六十有六孝婦自初事翁姑逮於屬纊二十餘年迄未嘗有倦容有德色祖姑翁姑以及娣姒姑姊妹亦卒不聞有間言也難哉孝婦享年七十有一生子四次君燦東字曙堂與余交且八九年溫雅蘊藉不類商賈顧不知其母之賢有如此也贊曰百行莫先於孝亦莫難於孝何則非有精誠貫其中而欲以意氣從事旦夕之間變態出矣烏能持久而不懈

哉况翁姑三人性各相反協其一則忤其二獨能調理保合化戾爲祥有造於李氏者實大此無論閨闈抑亦行義君子之所難也采諸輶軒足光史冊姑載筆以俟訪焉蔣辭如此誠重之也後翁姑相繼歿蔡及夫本預更三年盡哀盡禮道光八年本病垂危巫醫束手蔡不知所爲遽割股和藥以進本疾旋瘳遂以偕老蓋終其身門內無勃谿之行待人

有寬惠之德洵可以風世矣

見所見齋文鈔程業修合州志○森楷案蔡氏純以孝著與節孝者之必有守節年

分不同此編固有無翁姑而守節者不可以云孝亦不可云不孝故仍于節孝內著之則此孝而不以節見者非無節也遇爲之爾既未特立純孝傳即仍著于此

有劉景榮妻吳氏州興里虎頭寨人徙居治城既歿之二十五年其族弟劉景輝爲之傳曰節孝婦吳氏餘慶里舊家女

○森楷案餘慶里名見舊州志不知今屬何里嘗持以訊諸故老言人殊苦無確據以證其是非姑置諸存而不論之列今劉君云云當必

有說但不知可信據生有至性年十九適望江門劉景榮家貧甚與翁

否今姑依原文作 肇明皆治庖爲生吳結縵六載夫卽病歿慟絕復甦者數所親慰之曰若有舅姑在年已衰暮若死則兩老人更無所恃子旣失養其所爲娶婦者謂何吳爲之憬然遂去服飾鬻手工以佐甘旨無何姑彭以病失明吳晝夜扶掖巾裙廁踰皆滌濯皎潔雖手皴足皴弗恤也肇明以衰

合川縣志卷五十一 列女二

十一

老無人僱庖饗殮時不繼乃營茶社爲生越七年翁又邁罷癘疾長卧床褥吳常左右之自卧起至飲食若便皆躬自扶持一身而百役靡不爲也家無升斗儲每晨起爲舅姑盥沐烹飪進朝饌乃敢出理茶社事吳衣履皆垢敝而時致肥鮮供舅姑或外食有魚肉不食而裹歸以遺親同座見其然多分餉之輒固辭惟同街族叔步瀛公時濟其乏則受然必朔望至家候安或有事貸勞以報之親病近十年奉事如一日不特無怨言亦無倦色後舅姑相繼歿盡鬻簪珥服飾以殮葬鰲魚觀祖塋側哀毀骨立悲感路人其他行誼皆甚摯而孝尤篤云吳生道光乙酉歿光緒甲午享壽六十有九守節四十四年葬董家壩無嗣族兄鴻舉爲余備述如此乞余爲傳因撮其大略以俟表章者之採擇焉

興里採訪

稿投有易顯恩妻華氏州來里尖山場人年十九歸顯恩越二年顯恩

故無子以弟子朝烈嗣先是華姑朱氏病足卧床褥者前後十餘年華侍奉湯藥未嘗暫離朱偁之曰孝至是愈益親密族黨有來賓者輒藉侍疾爲詞罕與相見爲禮甚乃不言不笑並不輕踰門闕一步清宣統二年蒙恩旌表節孝時年五十今又閱十一年守節已三十九年見存

東里

其孝行之奇者則有姜景瑞妻袁氏合州人年二十六景瑞卒時生子甫三日也袁思不自全絕粒不食誓以身殉翁姑勉謂呱呱在抱何遽棄之忍死撫孤使夫後不絕賢于殉夫多矣戚鄰亦交相勸勗乃復進食後姑病更數醫不瘳袁焚香夜禱刲股和藥以進姑病得痊久之乃卒袁盡哀盡禮一無逾軌聞者偁之守節四十四年年七十卒嘉慶十四年奉旨旌表入祠同時又有姜正典妻陳氏以姪爲嗣事姑以孝聞守節三十六載未知于袁何屬也寇宗重慶府志有苟檀妻喻氏定遠街子壩人年二十歸檀生子文炎檀卒年三十矣森楷案苟節婦傳作夫歿年二十五据苟

氏譜稱檀生丁巳以丁亥卒喻與同歲生則實三十非二十喻撫文炎五也或請旌表時恐三十歲不合例故縮短耳今定從譜

成立乃沒年四十三嘉慶九年甯于旭署合州有文名文炎爲請旌表十二年朝命下准建坊文炎請于旭爲之傳曰嘉慶甲子予署篆合陽時太學苟生文炎因公來見晉接之際恂恂如也是冬鄉城紳耆以狀進請具冊申詳大憲題請旌表其母披覽核實於例符合因爲呈請如典夫闡揚貞烈以勵風俗官斯土者之責也苟生重請爲母立傳予綜

合川縣志卷五十一 列女二

十二

生平叙列如左按狀節婦性端謹慈惠喜聞人誦古節義事遇善良爲僉壬所陷害者輒泣誦者不忍畢其辭淚甫收旋請終述之復悲哽不能自勝蓋其性然也姑朱氏歿繼姑楊御下嚴厲稍不當意遭斥矣婦事之進無怠容退鮮怨言楊病親侍湯藥疾革刲股肉以進疾竟獲痊族黨以爲難夫歿節婦二十五歲時里中瘟疫盛行舉家病氏彌留不省稍差始知哀毀骨立幾不欲生以姑老子幼求死不得勉起摒擋家事時苟氏爲合望族子性繁衍而氏家田產殷富雖房戶分炊大業尙統於一孤子孀婦嫌怨易生婦則內秉冰孀之操外著宏達之識克勤克儉以教以育勞瘁至五十年而歿至今子能克家並列冠裳可謂大有造於苟氏也文炎承母教學將有成屢應童子試弗獲遂援例入成均十二年丁卯朝命下賜帑樹綽楔有司具綵仗儀衛送主入節孝祠陳牲致祭歲時肅將如禮論曰節孝庸行也而世每於慷慨激烈者稱焉夫婦不幸而以節見詎以圖身後之名歟乃數十年茹檠飲冰白髮青燈心如古井泉水此種特操非稟乾坤正氣者烏能哉徐世勣謂願爲良臣不願爲忠臣予謂能爲節婦則亦能爲烈婦特以心而不以迹

耳世乃從而兩視之然則節義之事彼烏知之然實馮鎮巒之辭也今載晴雲山房集中苟氏族譜節婦傳有顏邦明妻馮氏字靜芳州城內人故舉

人馮鎮巒之次女也鎮巒自有傳馮幼隨父之清溪校官任讀書史耽吟咏而持身嚴謹禮法自將尤好宋儒性理之學嘗和張乃孚女晚香女史詩有云日侍親庭讀近思其大概可見已及笄歸邦明邦明故舉人熙孫也馮入門時熙已下世逮事舅姑致敬盡禮道光十年闔家染疫馮竭力將護無所于嫌俄而姑病涉危馮惶急無計遽剖股以進乃得有間二十六年邦明病重馮復剖股和藥進之及邦明歿馮養教二子嚴慈交盡長子其奎游泮由母教也馮以壽終其同時前後剖股愈翁姑夫者有夏緒虞妻苟氏蕭錫春妻曹氏何子元妻柳氏杜世泰妻顏氏顏廷玉妻張氏李楹妻趙氏杜玉璵妻苟氏陳景明妻楊氏徐心廣妻喻氏陳大受妻王氏陳清泉妻唐氏馮定榜妻蔣氏葉顯章妻唐氏陳興彥妻池氏曹開泰妻向氏中唯馮氏柳氏顏氏池氏楊氏苟氏別自有傳餘並具邦媛譜程業修合州志森楷附記有馮師晦妻郭氏州西里沙魚橋人師晦故舉人鎮巒子也鎮巒自有傳郭于歸時姑龔已卒于清溪

合川縣志卷五十一 列女二

十三

校官任自恨不逮事之因于繼姑張極盡孝養鎮巒心甚嘉焉道光十年鎮巒卒于官郭佐夫奉姑扶輻歸葬十二年師晦病革郭聞先姑龔曾兩次剖股以奉大母遂亦割股以進師晦仍不愈而卒時郭年二十六遺二子一女家無餘貲乃勉力摒擋自奉姑甘旨較豐之外餘皆一從省約非節時不食肉以此貧而不窘治事之餘惟以教子為念每夜燈課兒輒以繼祖書香訓之後其子元祖以鎮巒所箸晴雲山房詩文全集呈請重慶知府王夢庚序而行之固鎮巒外孫苟鍾漢門人苟培初之由亦未嘗不本于母教也郭年五十卒守節二十四年程業修合州志森楷有蔡元培妻唐氏州人事翁姑甚謹姑性方嚴唐委曲將順每事務得其歡心翁嘗病篤唐剖股和藥以進遂瘳光緒初姑八十三壽終翁年九十猶存五世同堂一門雍睦說者謂其和氣致祥云程業修合州志是皆剖股以成其孝者也若為夫病剖股則有陳興彥妻池氏州西里人年十八歸興彥五歲興彥病卧月餘巫醫罔效池不知所為遽焚香告天剖股和藥以進興彥飲之越五日愈又三歲卒池年方二十六撫養所遺二男兩女以時婚嫁育子孫矣甫五十年其孫陳景明妻楊氏

又有割股之事楊氏者楊家穀女年十六歸景明百日而寡從此不妄語不苟笑不輕接待賓客閨門以內肅如也光緒十六年夏姑姚氏病將不起楊齋戒沐浴虔誠禱告經七晝夜乃割股襍湯藥進姑三日愈池猶及見之謂是兒類我真孝婦也明年池卒年七十七又三年楊卒年三十當未死前三日告其姑曰昨夢冥府來文命兒爲酆都神將不久矣姑以妖夢無憑諭之至期又告曰冥府遣駕來迎今卽去矣惟未終養事畢斯歉歎耳言訖澡身焚香拜辭祖宗姑嫂拜畢就椅端坐而逝家人皆聞空中隱隱有音樂聲豈果修文才子盡人間徵到女相如邪洵異聞矣興里採訪員來稿有陳在鏢妻周氏州東里人善事舅姑習尙勤儉時皆偁其恪守婦職道光二十一年夫病周遽升樓誓天割股和藥以進其疾遂罷後至八十壽終子廷瑞歲貢生程業修合州志有朱一桂妻李氏州人事姑盡禮姑病目幾瞽無法可治李爲割股煎湯以進姑病獲痊後一桂亦病瀕危李復割股和藥進之夫病亦愈人皆以爲誠感所致事聞詔旌孝婦如例後以壽終程業修合州志有黃金美妻劉氏州西里天星橋人歲貢舒之女也幼讀書知大義及歸金美爲繼室撫前妻二子

合川縣志卷五十一 列女二

十四

甚有恩意事姑尤孝姑病危篤爲割股進之遂瘳後夫病重復割股奉之亦愈事聞詔旌孝婦生子德正娶于蒙氏蒙亦舊家女事金美及劉均得歡心劉嘗病篤無可救藥蒙援故事割股和藥雜進病良已劉後至九十歲乃終蒙以光緒十八年卒年八十四奉旨旌表孝婦並立碑涼水井黃氏族譜有馮定鼎妻文氏州人定鼎病數月巫醫無效文焚香告天割股和藥以進定鼎飲之遂瘳然文初未嘗自言也後定鼎見其創痕問始知之意大感動伉儷益篤然文自念多病恐遂不能生育婉勸定鼎置妾初不許久乃嘉納生子集成未幾定鼎病歿文時年二十八孀姑猶在堂乃以教養事付之妾而自奉姑甘旨累歲不倦後姑壽終光緒初年六十四存程業修合州志有周延伊妻吳氏州興里東嶽廟人延伊兄延仁延鎬並歲貢生延伊獨積學不售刻意攻苦期步後程遂以致疾時吳已來歸數年矣尙未有子也見夫病篤危急無計遽焚香禱天割股和藥以進病得小愈未幾復作遂卒吳時年二十八僅遺女二哀毀絕粒族親勸以事親撫孤續夫裡祀始爲節孝乃復進膳一意事奉翁姑務得歡心翁姑嘉之命以延仁子德承祧吳嫁女取婦竭盡心力

而德從事鹽務頻年遠遊遺妻子在家吳更教養之今孫太琳橐筆權關太瑄成都農業學校畢業生見充潼南縣實業所所長皆粗能自立矣而非吳之力不至此論者以吳矢柏舟力全三世非特延伊賢婦亦實周氏功臣云清光緒■年予旌又■年卒年七十六延仁後官綏定府學訓導子芳椿以病留家其妻戴事之量藥料水終日不厭勤勞忍耐迄至病終一慟幾絕祖姑繼姑並以節哀順變撫育所遺三子一女成人婚嫁始盡天職何促促身殉爲適延伊妻吳至亦開譬之戴因矢志孀守侍奉重闈曲盡恩禮教育子女克儉克勤見均成立戴以■年卒年六十三苦節三十四年興里采訪員來稿有鄧建富妻蔣氏州人

笄年于歸數年建富病篤蔣封股和藥以進不愈時蔣年二十八子啟信甫二齡耳與孀某同居孀有子婦楊亦寡居而家素貧窘備極艱辛蔣事孀如姑乏則調之無何孀夫婦並故遺孫啟玉瑩瑩無依蔣令與啟信俱讀書婚娶一如己子久之啟玉夫婦繼歿遺孫男女四人蔣復爲之撫育婚配論者謂其有始有卒人所難能云後以壽終年七十四守節四十六年程業修合州志有楊榮妻駱氏來里興隆場人歸榮時榮尙應

合川縣志卷五十一 列女二

十五

童子試攻苦致病濱危駱見巫醫無效惶恐不知所措遽封股和藥以進榮病旋瘳後入郡庠生子高遠而夫兄子高攀幼孤無依駱撫教之恩如親子年四十卒來里楊稿高遠有梁元貞妻曾氏興里思居鋪人歸元貞時事翁姑盡禮有影響之譽與元貞亦相敬如賓無幾微囂陵詬誶聲居室六載而元貞以水死無子曾時甫二十四痛欲身殉翁姑以大義責之乃止旋爲撫子運鵠承元貞祀曾命之讀暮年不能終卷乃改而耕時教誨以處家立身之道運鵠唯唯後遂以農起家久之姑病宛轉牀褥間曾侍奉甚至危篤則封股以進姑終不愈未幾翁亦繼逝曾竭力喪葬盡禮盡哀時人稱純孝焉光緒二十一年請旌節孝朝旨報可未幾運鵠婦死遺孫宏善尙幼曾代撫之今已能業醫矣民國六年曾卒年七十六興里采訪員來稿皆爲姑爲夫兩度奏刀其愚殆不可及而應手見效如影隨形又何神也至張仲友妻華氏州人事舅姑甚謹姑沒繼姑翁特好施與喜賓客不問事力有無意霍如也華曲意承順先事豫備未嘗失其歡心及舅姑繼逝其叔母徐來視因留居其家華事之如姑徐忽病癱甚篤其子及婦皆來省醫者謂創毒甚固非人吮之則

毒不能出愈且難徐子婦並有難色華爲之吮數日果愈其諸孝思不  
匱永錫爾類者與程業修合州志則事非割股亦非爲翁姑夫而以孝思不匱  
之誼推之固亦錫類之仁因以埒焉

其節孝而教子孫成名者在明則有王肱妻童氏合州人年二十八寡  
家貧教子不肯姑息後撫孫亦如之遂能多所成就孀居五十餘年或  
欲上其事請旌揚童曰婦職當如是耳何炫耀爲遂不許卒年八十六

其後子孫貴盛人以爲完節之報黃廷桂四川通志森楷案舊州志選

王俊民翰林王嘉賓王順德王大受御史王策王祚昌王任杰舉人有  
訓導王瓚教諭王器王近臣王一舉不知孰是其子孫也不舉其名遂  
不可考志之不宜在清則有石邦楫妻楊氏州來里大河壩人邦楫以

康熙甲子舉人選任潼川州直隸州學正妻卒聘楊爲繼室年及笄矣  
生子璵璠邦楫卒官楊扶柩歸葬撫子成立內外肅穆以賢淑聞後璵  
以諸生中康熙四十七年戊子科舉人璵以廩生充歲貢書香不絕論  
者謂楊之力爲多年五十三卒奉旨建坊入祠同時旌表者又有監生

石瑛妻張氏瑛與璵璠連名張非楊之子婦亦其從子婦行也寇宗重慶府志  
張乃孚合州志有程時妻董氏合州人時幼聰穎垂髻爲州諸生旋食餼有盛

合川縣志卷五十一 列女二

名董父才而妻之年十七于歸時程董皆合州舊家時尤篤于伉儷見  
者以爲金童玉女不啻也董慮其燕女溺志數勉時刻苦于學永夕篝  
燈以紡績佐伊吾以奩具資修脯不欲用瓶壘擾夫子下幃勤由是賢  
內助聲族黨咸嘖嘖焉閱十年時卒遺子明遠明述明選俱幼稚嫡庶  
姑四年且衰范忍死節哀養葬如禮教三子俱入邑庠克繼父志苦節  
三十四年卒年六十一森楷案梅雲漢程節母傳云今節母年近古稀  
則似不止六十一而兩志皆云苦節三十四年

今從志而乾隆十三年知州劉桐爲請旌奉旨建坊明年明述請署州  
梅雲章爲作程節母傳桐字嶧南山東濟南駐防旗籍漢軍舉人曰女

子以節見難矣雖然徒以節見甚至一激烈時頓使珠沈玉碎於鏡破  
釵分之候其志非不可嘉而於夫子無補也惟能留未亡之身以承夫  
子未竟之志其艱難困悴貞志苦心歷終身如一日卒之高堂終其孝  
養諸孤藉以成立勉爲其艱大而不屑屑於匹婦之諒有節如此不較  
難哉如程母董太君者洵可傳也太君卷髮爲故廩生程子諱時偶程  
子刻志青霄太君永夕篝燈以紡績佐伊唔以奩具佐修灑不欲以鉗  
壘擾夫子下帷勤賢助聲族黨咸嘖嘖焉鴻案相莊僅十稔而程子遽



賁志以歿維時太君幾不欲生因念嫡庶四姑在堂諸子瑩瑩在抱侍奉無人鞠育無人嗣是茹荼蓼御浣濯姑媳母子形影相吊有年中間歷事四姑養生送死人無間言而訓課諸嗣尤極嚴篤雖歐柳之畫荻和熊殆不是過以故嗣子皆成茂才聲起膠序行將簪纓競榮紫誥馳封以報節母一段艱難百折之苦况未有艾也前牧劉君業爲請旌准立坊表今節母年近古稀堅貞之操凜然松柏然閨閣賢媛上以邀國家之旌榮下以爲里閭之矜式而且蘭馨桂馥以舒晚香顯名厚實倍見於堅冰鬱拂之後節母之事已畢節母之志亦伸矣予於己巳歲署篆合陽悉其貞操嗣君程生明述乞言於予予曰是以節見而不徒以節見者洵可傳也况樂道人之善又予素志哉爰爲記其梗旣俾垂永久云後入祀節孝祠

張乃孚合州志

有陳籍妻徐氏州西里太平場馬鞍山人

笄年歸籍連舉丈夫子五籍因有作述意援例國子監太學生將以應鄉試未及而卒徐年方二十八躬親養教寬嚴並施五子遂皆成立而事姑尤以孝聞一時僞爲賢婦後長子以龍中乾隆四十五年庚子科武舉以台以莊入武庠以先國學生以惠貢生一門衿紱論者皆謂節

合川縣志卷五十一 列女二

十七

孝之報云嘉慶十七年有司以其事上聞奉旨准予旌表建坊入祠十

九年卒年七十六守節四十九年

○森楷案府志作四十六年據陳氏敦本堂族譜徐以乾隆四年己未生

三十四年丙戌失偶由丙戌下數至嘉慶十九年甲戌適得四十九年非四十六年也志小誤耳今訂正作四十九其年建坊文

人題贊詞詠者甚眾惟舉人張乃孚贊爲工其詞曰芄芃者松森森者柏久歷冰霜愈顯貞節德門有女乃歸季方孝親教子珂里名揚年踰古稀書銜鳳閣生榮死哀輝煌綽楔嘉陵浩渺渠水潏洄懷清致富遙峙巴臺餘畧不具二十五年有童子賣柑坊下過客某買而懷之旁一叟曰客何爲者客曰將以遺兒子輩耳叟取一柑擲坊上孝字鈎際瞿然曰汝但知有兒子亦知此何字邪言訖不見轉視叟所投柑中處則深入若彈丸色微赤至今過坊下者往往猶傳說其事則柑痕固宛然在也

寇宗重慶府志敦本堂族譜陳

有翁聯科妻劉氏州人年二十寡矢志苦節訓

子大猷中乾隆四十五年庚子科武舉四十九年甲辰科武進士官至

廣西鬱林州守備張明祥妻王氏年二十而寡苦志守節教子舒讀書

舒後充乾隆五十四年己酉科拔貢生

張乃孚合州志

有刁啟泰妻熊氏州西

里老石橋人年二十于歸四歲夫故遺子大善僅周晬熊撫之成立教

以孝弟大節爲援例入太學以循謹侑鄉里熊年五十九卒苦節三十年嘉慶元年奉旨建坊旌表入祠有爲之贊者其詞曰有鴻高飛有鵠不食殉身匪難撫孤是力非松何勁非鐵何堅維勁與堅歷數十年有子克家耕與讀兼名士往來留賓侑賢芝蘭生庭斑衣醉舞白髮堪娛藏春之隲亦不詳誰作也

張乃孚合州志西里採訪員投稿

有康宏勛妻蕭氏州人

笄年于歸生子朝佐僅七月而夫故時年猶二十也蕭立志守節事衰翁撫孤子並撫七齡弱弟送讀昏娶以至成立皆其一身任之年七十卒鄉人爲之請旌入祠列名總坊孫曾五人並入州庠論者猶謂爲蕭之餘澤也

程業修合州志

有程邦協妻閔氏州城內人蔣璧芳編修爲其傳曰

宜人合卺之日夫邦協病甚已不能坐起閱三日遂卒宜人撫族人子爲嗣庠生起軻字文侯者也文侯生子業修拔貢朝考用吏部小京官升主事舉癸酉順天鄉試貤封祖父母如其官蓋天所以報宜人之節也宜人賢而勤能予嘗宿吏部家吏部諄屬必宴起而予蚤起慣乃衣訖則已進盥盥訖則又進食謂其僕曰主人未起昨夜命汝乎曰非也太宜人命之客不聞乎堂上有聲交色綫以爲辯者是也每日黎明起

合川縣志卷五十一 列女二

十八

非夜不休矣文侯性剛喜面折人其交遊嘗云不與文侯校正恐無顏對其母耳其人人畏敬如此同治二年奉旨旌表後以壽終年六十一論曰節孝鄉黨重之朝廷旌之所謂得天地之正氣者也故天之報之亦異於常人吾聞吏部繼室劉氏善事其祖母寢處共一室吏部將取眷入都書來宜人憐孫婦獨居謂之曰汝宜卽去無憂我婦察其外慰之而心戀之也竟不去踰年宜人卒雖文侯已先死而吏部旣貴弟亦食餼宜人可無憾已

見所見齋文鈔

有羅大昌妻莫氏州人年十八于歸事孀

姑以孝聞二十六夫故遺子正儒二齡莫撫育成立爲娶妻杜氏旋入武庠生子三女二正儒旋卒杜年方二十七也莫率杜孀守教育孤雛養教並至遂皆有成女亦適人光緒初莫年七十六守節五十年彭年五十守節二十三年並存

程業修合州志

有易開讓妻駱氏州來里節度山人

文學張鵬翔爲其傳曰光緒三十三年歲在丁酉採風者以易母駱孺人節孝請於朝天墨浩蕩旨許建坊入祀節孝祠州里榮之爲父母者無不以之誨其女爲舅姑者無不以之勉其婦爲丈夫者無不以之勵其妻然皆徒慕其名耳而不知孺人之所以致此者其心亦良苦矣案

孺人易公肇儉之配尊三之母也幼嫻姆訓聞割鼻截耳事輒心響往之慨然曰女子不當如是耶長適肇儉公敬戒無違琴瑟靜好生三子長光復次光釗俱無祿三光謙卽尊三咸豐十六年丙辰十二月肇儉公卒尊三卽以是年八月生相去僅四月孺人自年十八于歸至是甫二十七歲中間倡隨不及十年石火電光遽睹滄桑之變此情此景誠有可爲長痛哭者而孺人盡哀而止抱此四月子不爲夜半悲鳴之鵠蓋其所見者大也夫妻之事夫猶臣之事君故歐陽公論馮道盛稱李氏斷臂之節所以甚道之不能死節也然亦有一死不足塞責者文信國云從懷愍而北者非忠從元帝爲忠從徽欽而北者非忠從高宗爲忠由是言之人臣當亡其國則以存社稷爲重殉君爲輕婦人當失所天則以存宗祀爲重殉夫爲輕孺人之茹痛撫孤爲宗祀計也恩斯勤斯劬勞三十年待其成立待其娶婦待其生子夫而後從夫於地下較之東晉南宋諸名臣男女雖別家國雖殊而其謀延一綫之心則固未嘗不同也鄉使孺人守匹婦之諒竟以身殉或如賈生哭泣以死烈則烈矣其如此呱呱者何然則孺人此心可以告先靈可以質尊章節也

而孝卽寓焉人第見其馨膳潔羞旨甘親奉遂嘖嘖於孺人之孝猶淺之乎視孺人矣至其接諸娣以禮撫諸子以慈同居二十餘年一家無疑忌雖常人之所難而不足爲孺人異也光緒十八年壬辰卒今其孫復生子又將成立矣易氏族譜有石明珂妻朱氏州永里人祖虎臣歲貢生自有傳朱年十八歸明珂又六年而寡遺子璧光方在幼孩而翁姑皆已老矣家貧無以自存惟藉鍼黹自活節衣縮食略有蓄積翁姑歿盡用之城鄉咸稱孝焉璧光少長教之讀四子書略上口乃出就外傳朱念饗殮之外兼供脩脯非并日而營勢不給由是青燈課子必三更後始就寢焉璧光旣成學歷就宦幕有暇輒次其母節孝事略徧求名人題詠以資表揚何文藻觀察之文范運鴻學博之詩其較著也清光緒末詔旨采訪節孝州人爲上其事于朝特准旌表建坊入祠時朱猶生存也又數年璧光在渝應試夢金旗入其宅醒而不解所謂俄訃報至則朱于其日無疾終時年六十苦節三十六年民國四年援案入節孝祠永里采訪稿有魏遠馨妻冉氏州西里雙和場人年十七歸遠馨生子子音甫二齡遠馨故家故不中人產至是益窘迫冉乃以紡績佐兒讀

米鹽瑣務一身兼之不令子音聞知以分其心族人或有事與爲難輒平心處之委恕求全不與爭較轆轤也子音以是得專心學業以初級師範畢業生歷充西里勸學學董團總諸職有盡職譽無內顧憂者大半得冉之力爲多現年五十六存西里採訪員有梁學時妻楊氏楊卽忠濟妻黃女也年十八歸梁氏梁故東里舊家祖雍附貢生翁權巽歲貢生夫學時文生學時爲權巽長子弱冠入邑庠苦志劬學一試鄉科而卒楊時年二十五遺子宗烈宗燾俱幼姑王已衰病常在牀蓐間楊侍奉扶掖昕夕無倦初不以委婢僕及弟婦謂我兼代夫職誼固當服二人勞也餘時操持家務不肯偷安一刻不忍糜費一錢同堂妯娌皆舉以爲法居恆教其二子曰汝家三代膠庠勿至汝絕絕則不肖之罪莫大焉二子唯唯受教然朝廷已廢科舉興學校無舊日科第階級則就本州學校肄業藉續書香宗燾見以中校畢業生充本里勸學員楊年五十五守節三十年存東里採訪員投稿

合川縣志卷五十一 列女二

二十

男也遂撫教之以至成立事聞旌表

黃廷桂四川通志

在清則有劉中愼

○森案

荀氏譜中愼字德中舊志分爲二人大誤今去德中名

妻荀氏州西里劉家巖人及笄于歸未久

夫歿無子苟水漿不入口期必身殉家人以有遺腹或爲丈夫子若折闕而死是劉氏一脈自此而斬其何以對死者等語勸之苟悟強起飲食旋生子興■撫之成立苦節三十餘年以壽終嘉慶十七年奉旨建坊入祠

張程二合州志寇宗重慶府志

有韓勝奇妻鄒氏州人年十九適韓氏半歲而

寡痛哭欲絕旣以有遺腹子茹哀待之及生果男撫之恩勤備至歲餘而歿或有勸其他適者答以從一而終雖寡獨無悔或慙而退由是堅貞自矢足不履戶外者四十年餘張乃孚修志時已五十九歲矣猶健在也

張乃孚合州志

有周正舉妻蒙氏州人于歸一載夫歿無子撫姪承祧未幾

遺腹復生一子蒙初未嘗有異言也族人或利其產而以有事爲榮因交構之遂訟于官數年不決蒙悟其非計乃攜兩子赴質知州陳某

○森

楷案道光初有陳廷鈺後有陳仲良皆能聽訟不言其年則不可攷

爲之保護判還乃結後歿年四十二

守節二十年

程業修合州志

有戴繼清妻顏氏州城北門人歲貢聯輝之女作

錦之姊副榜錫光之姑也年十七適繼清又八年孀居有遺腹九月矣

而無承服者遽撫兄公之第二子美渠爲嗣未幾子美懿生顏兼愛之人不知誰爲所出者美渠長援例州同美懿亦納粟爲國子生門庭雍睦終日怡和顏顧而樂焉光緒十一年請旌報可十七年卒年五十六二十一年建坊于縣南白塔坪之觀音巖廩生蕭望崧爲作綽楔記曰夫婉婉聽從姆教嫻于內則衿鞶視諛女家重以外言窈窕爲容勗師以敬聞詩聞禮同德同心皆彤管之恆談非朱絃之變調更僕難數匪今罕聞若乃巴婦興懷齊嬰無恙鄧能存姪趙竟遺孤旣肥瘠之攸關無彼此之岐視伯仲非徒肖貌衣裳則傳服皆新國人能習用心帶弁則威儀如一如戴母顏老安人洵足多焉安人歲進士聯輝公季女年十七于歸參軍穆如戴公三日調羹尙訝女而不婦十年舉案堪嗟人也未亡蓋咸豐辛亥年適戴氏越庚申冬而夫子捐館舍是時已有身矣遽撫司馬從五公子爲嗣人琴亡矣慟玉樹生理天櫬垂乎扶龍目旁挺未浹旬遂分婉雙丁兼字一體相同沒世有偁人言無閒光緒乙酉爲安人五十慶辰子州同美渠監生美懿合族戚顛請旌表得上俞允迨辛卯乃告終焉迄今建坊事竣二子屬載筆紀之墮淚刊碑我敬女

合川縣志卷五十五

列女二

二十一

中國士貳心易操人羞世上亂臣讀者以爲實錄美渠子大燧妻李清員外銜鈞女年十六歸顏已前卒聞其軼事心嚮往之二歲大燧歿遺一女未久殤李無所冀恆鬱鬱美渠知其意乃以大輝之次子爲之嗣李愛如己出及少長遣外讀夜則篝燈督課如嚴師人皆偁其有母道焉然李性特愛潔而不喜殺生自夫服闋卽不茹葷酒有戚里來者非至親罕得見其面時皆偁其有顏之風云民國五年卒年三十三

里興

採訪員

有張宗琳妻王氏州西里金子沱人幼讀書通大義笄年于歸

至二十三而寡遺腹生子潛王撫愛備至少長當入塾王慮有意外不欲令就傅而又無力延師乃自授潛四書五經皆略上口至潛成童乃始外讀後入邑庠補增廣生王皆及見之王性至孝善事翁姑而苦家貧旨甘不繼乃作鍼黹佐之每食必有酒肉翁姑皆不覺其窘也翁歿有富者助葬資堅辭不受其廉介又若此光緒初己年七十二歲苦節四十九年矣

程業修合州志○森楷案凡言光緒初皆指程業修續修州志之時而言後放此

有杜世泰妻顏

氏州東里人庠生邦暉女也于歸四月而寡遺腹生子代本顏性純孝姑病刲股療之得瘳庶姑歿遺乳弟爲撫育之愛如所生後代本成人

娶婦周氏生三孫而卒周始年十九顏與周共撫之復皆成立光緒初  
顏年五十七守節四十年周年三十九守節二十年

程業修  
合州志

有常仲倫

妻蘇氏州人笄年于歸生子盛榮年二十三夫歿遺腹生子盛華繼姑  
不欲其守爲奪志者屢蘇泣血毀容誓不再醮乃止後子長成均已授  
室忽夫婦並相繼亡惟盛榮有子世珍僅延一綫盡心養教歷十數年  
爲取于某生曾孫永忠永臣世珍又故蘇復撫之凡傳三世一身任之  
不憚艱辛說者以爲常氏之存非蘇之力不至此光緒初卒年八十八

守節六十五年

程業修  
合州志

其善撫前室子者則有張瑞麟妻楊氏合州北城人清康熙時瑞麟爲  
諸生有文名登拔萃科將入都妻死娶楊爲繼室因留省鄉試榜出乃  
得副車意抑抑不自聊歸里久之卒楊時年二十一未有子撫前妻子如  
己出既抱孫其次孫心載尤鍾愛焉爲聘安居貢生黃瑋女爲妻婚有  
日矣心載忽爲逆奴謀死黃女聞訃一痛幾絕請父母願歸張守貞瑋  
哀其志許之入門未幾翁姑繼沒女事楊有加禮撫兒子恩勤臻至楊  
及家人宜焉兄子有室生子翬楊卽命以爲心載嗣女待之尤篤摯不

合川縣志卷五十五

列女二

二十二

知者謂眞其所乳也楊年六十八卒女由此一意苦守備歷酸辛又四  
十餘年卒年六十餘時偁一門雙節有坊在城外燈油街同治庚午圮  
于水邑人改立碑駱公祠前今存

寇宗重慶府志  
張乃孚合州志

有楊通極妻劉氏州

西里人年二十三夫故遺子尙幼撫至九歲而歿惟前室張氏子光第  
在劉故待之有恩至是益加親厚光第感之不啻所生後入武庠報至  
老姑聞之謂劉以此兒能有此亦不枉汝費心則其平日感情之深可  
見也及姑病卒劉遂長齋繡佛不近葷酒藥爐經卷隨在自娛光緒初  
年四十九守節二十六年

程業修  
合州志

其無子別繼教養成立者則有吳秀常妻袁氏州西里錢塘鎮人年十  
八歸秀常敬翁姑禮伯叔待昆弟敬而且和人皆偁之曰賢明年秀常  
病篤臨終撫袁泣曰我乃無子死當奈何袁哭對曰年之修短子之有  
無命也婦人之義從一而已卽家無餘人猶終身不改况有姪可撫  
敢易節邪秀常曰能如是我目瞑矣遂卒袁因以從子爲嗣且養且教  
義兼嚴慈凡飲食衣服日用一切均淡泊自甘至老不易略無勉强忍  
受之意見于言色年八十四卒族親以詩文哀挽者頗多道光中予旌

表入祠

西里采訪  
員來稿

有郭順芝妻刁氏州西里雲門鎮人年十九歸順芝

又二年寡光緒三十年卒年八十四守節六十三年先十年請旌表旨

准建坊知州長沙黎承禮爲記其事于坊曰郭母刁孺人者性淑慎歸

郭氏時翁已歿逮事威姑朝夕問視惟謹越二年夫歿無子有小叔一

孺人既守從一之義又不欲以旁支亂宗祧必俟叔壯有室屬繼嗣焉

森楷案繼嗣作螟蛉今以其引用不合爲改正之

由是居寡獨三十餘年至叔秋圃舉子二始

以其次男長青爲嗣秋圃亦慷慨知大義及長男卒無嗣初不敢以已

失繼緒有逆寡嫂志也孺人有德而善頤養聞已行年八十猶康強殷

勤教子弗衰云論曰昔人稱康成所居爲鄭公鄉其門曰德禮門若郭

母之守禮秋圃之讓嗣庶幾哉有古人風矣承禮字薇孫故蘇撫謚文

肅公培敬側室子以翰林院庶吉士選授四川崇甯縣知縣升署合州

知州有能文名此則寥寥短章無足觀者以人存文錄之

西里采訪員  
來稿森楷附

記有喻世鳳妻劉氏州人年二十五夫卒遺子大川大仕辛苦撫育俱

克有爲大川娶于彭大仕娶于劉數年大川卒無子彭哭泣極哀劉命

大仕生子卽以子之未幾大仕亦歿遺腹生子德延彭徵前約乃以一

合川縣志卷五十一 列女二

二十三

子雙桃既定議矣會族中有覬覦財產欲以其子入繼者乃搆成訟端

將取決于官卽家庭權也劉抱孫訴之官判如原命案乃定時人有爲

之語曰兩世孤孀守茲一脈一子雙桃天相有德言其訟不得長而家

可保也光緒初年六十七存

程業修  
令州志

有吳公璽妻青氏年二十四寡居

遺女三撫育成立皆適名門翁姑逝世盡禮盡哀卒年五十蔣用山挽

詞有十八拜姑孀■廿四奉神主摩笄山前恨難補此後安身何所依

伯道無兒中郎女玩其語意似終未立後者其故維何書缺有間不可

得而攷矣

西里采訪  
員投稿

其妻妾同守者在明則有張仲懽妻某氏妾湯氏妻以年長已踰旌例

不錄湯自有傳在清則有東里三匯壩人雷一品妻鄧氏同其妾杜氏

撫子聲和爲嗣相與守志不渝杜先沒苦節四十一年鄧後九年卒舊

志不載其行義年莫可得而詳也至道光末州學正簡州舉人陳惺沒

于任妻黃氏年二十九妾劉氏年二十七以宦橐蕭然無以爲歸計也

則儼廬州城以紡績度日久之遂入合州籍矣黃撫一女劉撫一子名

前緒共養教之粗能成立光緒初各五十餘俱守節二十六年矣今不

知其人及子女所在或謂清學署有老吏陳陽春卽其從子相隨流落者森楷向識其人未問其家世今久作古人無憑參證疑不能明也程業

修合州志  
森楷附記

若妾專守節者則有苟文璧妾楊氏陳在瑛妾萬氏俱守節

有能名萬自有傳楊埭見苟文燧妻鄭傳見賢能篇又有張化醇妾文氏王國周妾蔚氏見邦媛譜

其節孝而有特別性行者則有何英猷妻唐氏州人年二十四喪夫立志守節始終不渝而素性好潔所居內外不留纖塵及後病作有來省視者唐輒疑其不潔不許入室人亦以是憾之將死預知其期刻日不爽光緒初卒年四十六程業修合州志有戴大燧妻李氏性質略與唐近陳景

明妻楊氏神異略與唐同戴附其祖姑顏氏楊附其祖姑池氏自爲傳其節孝而宜于家者則有喻朝宗妻楊氏州人未笄歸朝宗年二十二而寡遺一子一女及孀姑幼弟並楊是依而姑久病癱初入門時卽盡心服事惟恐一不得當傷老人心至是責無旁貸益拳拳加之意姑心爲安侍疾之暇卽經理家事撫幼弟及子女備致恩勤惟少有嬉惰則教誡必嚴無少姑息是以弟及子女皆愛而畏之後姑以壽終少者並

合川縣志卷五十一 列女二

二十四

成人有室而楊亦旣老矣光緒初年六十八存程業修合州志有羅祖堯妻周

氏州北城人在室母卒事繼母吳以勤謹小心特見鍾愛有如己出及年十六歸祖堯翁姑猶盛年而主家儉嗇不輕易破費分文周體其意事從省約翁姑皆無所于呵及姑生夫弟祖虞未久姑死■覓乳維艱適周生第二子卽兼乳之提攜保抱一與己子無異翁甚嘉焉咸豐七年夫卒周年方二十七事親撫孤備極勤苦初未一語怨尤及祖虞長將分炊翁念其節孝有義特命于應分外別提房產一處歲入租可八十緡爲周酬勞養膳及請旌建坊之用祖虞聽命光緒二十二年請旌報可二十三年卒年六十七二十五年祖虞率其二子並孫曾等奉神主入祠惟坊未建房業已售去子孫等亦零落殆盡節孝之門亦不一定昌大與何其報施善人有時而或爽也永里采訪員來稿有杜正祥妻文氏州人年二十九夫死遺三子二女姑以哭子故膺心疾文左右就養得其歡心姑疾以平後與翁爭言病復作遂歿翁繼娶某氏生子文撫視之逾于己子繼姑終疑之乃分爨文一聽翁命無于爭遂以相安文長于言語族親有不了事至糾葛紛擾文至數語卽解或固執意氣



則宛轉開警務歸和平乃已姻黨皆甚德之光緒初年七十五守節四十四年

程業修合州志

有李德暄妻鄧氏州東里黃邨壩人年十八歸暄廣類

豐頤人皆以爲福相後四歲而寡遺一女無子時家政爲夫弟厚督理閩內之事則鄧領之與諸娣姒分番操作日盡爲常入夜則侍孀姑寢處姑或諭以早休則曰諸娣姒皆有兒女如九子母安有寧時我僅一女耳截長補短舍我其誰且若父未盡子職我代盡之禮也其敢偷閒自暇逸乎姑亦遂不復強計侍姑二十三年初未嘗有懈容諸祖考妣生日忌辰鄧皆熟在胸中先期預備未嘗忘缺門庭清潔客來隨處可坐不待倉卒拂塵酒饌必豐饗殮必適無楚王醴酒秦伯夏屋之嘆門內尤雍穆諸姪男女繞鄧相依如親其母平居紡績工作有常處前後所踰不失尺寸家中人人感其如此遂亦相率用命曾無抗拘不如意者久之乃議撫從子紹文爲嗣今已娶婦女亦適人鄧年六十有五見

存東里採訪員投稿

其節孝而克成其家者則有郭師伋妻馮氏州西里沙魚橋人歸師伋時師伋方以生員謀進取遂用勤勞致疾年二十餘師伋歿遺二子堂

合川縣志卷五十一列女二

二十五

壘尙幼夫弟師偁未娶馮內督家政外擇師教子弟有條不紊家政肅然師偁弱冠娶妻任氏二載師偁又卒遺一子堅任哀痛欲死馮開譬之乃共同持門教子成立堅後援例貢生乾隆十八年馮卒奉旨建坊旌表入祠三十六年任卒恩典一與馮同今猶謂之雙牌坊是也任坊有贊詞曰孤節挺松冰心傲雪性秉自天事安于拙半百春秋始終如鐵享年大耄輝煌綽楔不記誰作以事度之堅旣列名成均則家非貧薄交游當不甚寡或其時親友中能執筆者之所爲也

張乃孚合州志

有雷聲

鳳妻徐氏州東里三匯壩人家世清門姪孫曾輩若步堂文林恩藻光斗光昭等入邑庠食廩餼者甚眾故徐在室卽以賢明著聞及笄于歸生子常彥甫一齡夫沒徐年方二十九矢志撫孤成家以報先夫于地下時家僅中人產徐勤勞節嗇自年節慶弔外未嘗休業亦未嘗肉食因有蓄積稍置田產爲子孫計常彥亦仰體慈愷刻意積家至徐晚年遂有田數百畝爲一鄉中上人家卒年八十有五曾孫自龍號琴川與余善玄孫澤沛高等藏文科畢業余門生也

東里採訪員來稿

有吳定裕妻鄧

氏州西里錢塘鎮人年二十四而寡遺子高夔尙在襁褓鄧以撫孤爲

已任而託家事于其內弟并以售產所得七白金畀之使乘時營運已得收其息有贏餘又益作本金或置業焉由是母子相生循環無端比高夔有室不及二十年而有田五百餘畝矣乃命高夔及族子高宗倡辦篤宗會利及存沒宗人皆偁曰賢見年七十有八尚不扶杖能行也

西里採訪員投稿

有馬瑞卿繼妻鄭氏州城內人于歸時年十五瑞卿先世故

買馬松鶴餠餅生理自庚午水災家漸中落頗遭俗人白眼思有恢復慨然振作可十所年遂以置買田疇不失舊物然用心過度遂發病死鄭時年二十七遺子三女一更有前妻子明達及其妻劉鄭待之如昔初無閒言後以食指浩繁別創松鶴濃烟鋪貿業時明達已死惟劉孀守不能經營乃命己子湘元廉泉管理而分劉別炊人遂以謂待劉薄也然劉自安義命紡績度日毫無怨言對鄭仍昏定晨省夏清冬溫以盡婦道又數年松鶴濃業停貿收得本金復買田某處家業益隆隆起乃命以孫繼劉爲嗣今孫且授室矣鄭年六十一守節三十四年劉四十六守節三十年並存西里採訪員來稿有黃再懋妻劉氏州東里三匯壩人初于歸時祖姑翁姑在堂劉事之甚謹先意承志禮無違者皆見嘉賞

合川縣志卷五十一 列女二

二十六

及年十九夫死無子已極傷感俄而翁又逝世無人支持家益艱窘重闈老人甘旨及其他食用一無所出惟劉十指是賴後相繼歿送死葬費亦于劉女紅取焉而劉毅然擔負不以呼將伯也中年稍有蓄積乃撫子立榮爲嗣會夫叔故縫人元和死不能葬劉見惻然則爲之棺斂殯送其妻無所歸又爲設法募捐俾得有啖飯處生母陳再醮易家復中落無能自存卽迎養其家經今三十餘年母年近九十矣劉謂可補半生違侍之缺對之怡然見年六十有一苦節四十一年東里採訪員來稿有王安湖妻夏氏州東里渭溪人處士大用之女歷任福建知縣岳池舉人李鎰之外孫也笄年于歸性勤謹喜儉樸荆布操作健於僕婢事翁姑甘旨必親供翁喜賓客酒食宴享皆能先意承志以備事夫相敬如賓夜復紡績以伴讀安湖弱冠遊庠得內助力多也姊妹妯娌有以針黹相挽夏輒盡力爲之未嘗有倦容先是王翁兄弟五人同居最相得子侄行惟安湖居長故五房嫁娶贊助多出夏手族人賢之舉女二長殤次適庠生唐勳年二十五時夫故無嗣痛哭氣絕者數族戚再三婉勸始進食矢志孀居而夫弟二僅一子無可撫三弟幼越十五年翁姑

歿矣始奉遺囑撫三弟安淮子麟爲嗣比及分爨家已中衰夏受分之業歲入僅十餘石應償舊債二百餘金有勸以鬻產者氏曰先人之遺也烏可失教育子女孤苦零丁衣食出自身謀鋤菜種蔬不假人手雖嚴寒酷暑不辭也日有不足常借月夜作燈光食或不繼則併日一舉火終歲食用需粟不過數石每逢先夫以上生日忌辰必率子以祭祭必豐旣徹又召子姪同享之十餘年中債償業存女嫁男婚奩儀宴聘無異素封現年六十有九家計頗裕勤苦仍如曩昔謂欲以身作子婦之表率也東里采訪有唐承哲妻鄭氏州東里渭溪人廩生汝愚之女貢生禹湛之外孫也于歸時年十六逮事翁姑及祖姑張張爲舉人森楷姑年七十餘得氏如獲左右手前姑張則森楷從姊也鄭未及見繼姑劉多病賴鄭以安鄭嫺女工翦裁繪畫精細入妙夫家故貧閒出手工餘貲佐兩世甘旨舉子二長殤育女二年二十五夫故之死靡他十餘年翁與姑相繼歿餘庶姑章章子猶未冠喪葬儀物鄭一身任之力薄不能兼顧姑與章子分居一門四口惟恃針黹度日忍饑耐寒不以孤苦告人赴族親宴會無縫紉諸事未嘗久駐或憐其孤寡貧困以貲

合川縣志卷五十一 列女二

二十七

物相餽助至親受而不辭他則謝卻之長女適李次適潘奩具都由勤苦來現年五十有六子收娶將見孫矣東里采訪有唐承欽妻王氏州

東里渭溪獨石礪人處士化綱之女於承欽母爲姪女行幼字承欽而承欽病癡自孩提至成人不識伯叔不知飽煖衣衣食皆待人爲其母見此欲悔之數商女不可曰癡壻亦壻命也命可違乎遂適唐事姑孝事夫敬朝夕奉扶與姑無異若不知其爲癡也者年二十三夫故撫姪承桃喪葬如禮隣里咸稱氏之貞義迄今五十有四歲子祐師範畢業制事以義聞率萱幃之教也東里采訪有謝昌蘭妻向氏州來里尖山場人于歸時年十六四歲而寡無子擇撫族子美緒爲嗣奉親撫子辛苦備嘗而天性仁慈見族戚及鄉里之貧乏者多量力調給無求不應時人皆僞曰賢光緒十六年胞弟雲南候補巡檢向國鈺以其事聞于朝得旨旌表時已苦節二十五年矣二十七年卒年五十五東里采訪是又幾于積而能散者矣以其事皆適宜救濟無昭垂于後世者故不入慈善篇

其節孝而遭時大亂能自保全卒存夫祀者在明則有董昌徵妻陳氏

合州人昌徵爲州諸生有時名明崇禎末死于賊遺一子甫周倅鄉里亂不可居陳乃負子避之黔中陳故有色時猶未衰黔有土豪某欲娶不許將加強迫陳遽毀容以死自誓因得免由此間關流離居無定所經兵亂三十年大節凜凜人無敢干卒撫子成立還鄉里以終有旨旌

表大清一統志張乃孚合州志

在清則有鄒秉衡妻趙氏合州西里人性質素自在

室已不喜羅綺惟聞人談古今節烈事則欣然忘倦及歸秉衡琴瑟甚敦而秉衡有志顯揚恆溺苦于學積勞成疾不數年卒趙痛欲身殉姑以有遺腹胡絕夫嗣諭之乃止及生男也心爲少憫甫睟而教匪起兵戈所指人命草菅斷脰橫屍所在皆是男子無免何論婦人有不受污而死者有受污而仍不免于死者覆巢之下完卵幾希鶴唳風聲人無生氣趙獨襁孤子扶衰親逐風塵犯霜露賊至則走賊去則歸奔馳于兩江間者蓋七八年無甯晷亦幸不與賊遇卒得全身全姑兼全其子至賊平而子已及幼學之年矣趙訓誨殷勤絕不假以詞色出就外傳專擇嚴師課餘歸家輒以讀書立品相勸勉子亦恂謹受教無少年輕薄氣趙意乃安趙六十壽子將爲請旌趙不許曰從一而終婦人天職

合川縣志卷五十一 列女二

二十八

養親教子亦分內事耳豈以夸于人哉何旌表爲子固請卒不從乃罷道光十年卒年六十三其鄰附生朱嶺秀爲誌其墓且贊之曰流離播遷之餘殉難成節者有矣孺人獨委曲求全而卒無所浼姒續一綫綿延茲始非智勇以濟其堅貞何克臻此鄒氏宗譜又有李心愷妻池氏池自有傳在賢能篇

其節孝而始終困難艱苦卓絕者則有姚安義妻劉氏州人年十六歸安義爲繼室時安義應童子試不得志恐顯揚無冀憤欲一戰孳孳攻苦窮日夜不休雖燕爾新婚無顧也未幾以勤學病死無子家徒四壁重親在堂祖父母壽近期頤父母之年亦在六七十間伯兄又病尪羸氣息僅屬無一能生財者惟劉及其嫂某能紡績針黹及其他女紅差足自給既丁茲變乃各并日而營一家數口得幸饘粥無缺久之祖翁姑翁姑兄嫂相繼下世應有附身附棺及喪葬費素無豫備一于十指乎取之既苦其不足供而時閒倉卒尤慮不能辦勢不得不暫從事于典鬻勾貸而徐議所償乃猶餘季父所遺之弱弟及伯氏孤兒並未成丁惟張口待哺劉義不能謝之則竭力摒擋以次而及可十年所逋負

爲輕而弟及兒子皆僂然丈夫矣經劉量其所堪俾各執業得食其力  
因有室家每追念前勞未嘗不感慨歎歎謂劉勤儉慈愛相待以恩相  
教以義其智猶可及其堅苦卓絕百折不回遂以一女子身保全三世  
其愚真不可及也後劉以壽終年七十苦節五十四年乾隆末旌表建  
坊如例張乃孚合州志興里採訪員來稿有鄧祖慶妻郭氏州城內人同治二年以守  
節年例符旨准旌表光緒初猶存蔣璧方編修問知其貧苦而矜之爲  
立傳曰祖慶字餘堂自以有異稟富室某欲得以爲壻請節婦之父媒  
之節婦父見而奇之遂自以爲壻富室甚恨而無如何道光甲午舉於  
鄉甫弱冠文章人品爲一州之望會試卒京師節婦年二十有二父老  
一子幼貧無以自存州牧藹山李公甲科有清德諭紳耆厚賻之已先  
以重金爲之倡未幾其父又卒無人爲經紀所得金皆耗去節婦劬箴  
以自活子長爲娶婦不能自治生又常久出不歸姑婦相依益窮困寄  
人廡下居時或不能償其租一日偕友人過營盤街街不當衝而行人  
少檐下一婦澣老且病友人指謂曰識之乎此餘堂先生妻也惻然甚  
憫問之餘堂親故無知者或曰謂其久故矣今固在耶問之節婦何親  
故不一往還曰食貧可也奈何覲顏向人以爲夫子羞節婦老而重聽  
氣弱語殆不能續而大段剛毅如此時年已六十餘矣後不知所終見所  
文鈔有周道治妻唐氏州來里利澤場人監生唐述山之妹歲貢唐協  
恭之姑也述山自有傳唐年十八歸道治家故不豐猶足自活閱四年  
道治卒遺子女各一皆在襁褓無卒歲資殊難圖存述山時周給之差  
濟眉急顧念一家三口待哺嗷嗷仰給外家終非久計乃自以針黹傭  
值藉資食力飯蔬飲水忍饑耐寒不爲富勢所移不爲巧言所惑卒撫  
子女成立各畢婚嫁其所嘗艱苦殆有下中人所不能堪者而唐以舊  
家女獨能甘之其度量固超越尋常萬萬矣年■十■卒守節■十■  
年來里採訪員來稿有魏憲榜妻伍氏州人年二十七夫故遺子德芳德明家  
貧無資以生乃勤紡績飼雞豬以供饗飧爲翁姑具甘旨遂以孝聞有  
餘則爲養教兒女之用後皆成人娶婦且抱孫矣無何二子及婦並相  
繼死僅餘二孫伍復撫之成立光緒初年六十三守節三十六年程業修合  
州志有曾廣榮妻徐氏州人歸廣榮時曾祖姑姑范年九十六祖姑張年八  
十及翁姑並在堂福壽康強萃于一門人皆羨其家瑞數年廣榮死徐

年始二十九遺子昭休未十歲也徐慮感傷尊親不敢極意痛哭安厝之餘惟對藐孤日以眼淚洗面而已未幾重慈繼沒翁姑及夫弟廣玉廣錦相續下世弟婦亦青年天亡遺孤子女五不十年間縗絰踵襲于歸所見之人無一存者惟麻衣小兒一堂幾滿餘則己之形影一相弔焉徐念家運如此關繫非小再一蹉跌傾覆無餘矣乃含哀忍痛勉力支撐外應機宜內兼養教諸孤漸長責任少輕而猶未能脫然無累也信曾氏之託孤寄命者矣光緒初年七十六存程業修州志有王鴻奇妻楊氏州來里古佛巖人苦節訖六十年既歿其孫煥同榜友■ ■ 爲之傳曰戊子科試余忝游泮時同榜二十餘人以王君成章列首選論者咸盛稱其祖母孺人苦節之報非偶然也余聞而欽佩之歲己酉成章復與余同任高等小學校教員昕夕聚晤言歡甚洽一日談及其祖母生平囑余爲傳以紀之余愧弗文何敢謬任然誼亦不敢辭也案孺人姓楊氏處士天海公女幼失恃賴祖張撫育婉婉性成率循禮教于女工針黹尤嫻及長歸鴻奇公公業醫恆外出內顧未遑家事悉資臂助孺人淑慎溫恭操持甚有法度性勤儉井曰必親荆布是尙有桓孟風焉年二十七喪所天遺孤子五俱幼其季生甫彌月卽成章父也孺人悲慘迫切欲以身殉繼念諸子無依徒死何益因勉強留餘生毅然以撫孤爲己任孀幃勵志比金石以同貞古井盟心誓波瀾之不起其苦節亦云至矣當是時夫弟多亡惟存一季姿閨弱而強主家政族中有桀黠者誑以借田出當俟贖回并償重利許之孺人知之力阻不能得田當而資竟全失家窘甚力不支乃盡售田業與季弟各分得錢數十緡自此地無立錫生計愈困環顧膝前待哺者眾旁觀且代危之孺人益躬自刻勵勞瘁有加并嚴督諸子長耕幼牧勿令稍偷片刻安積十餘年而衣食始稍裕焉逮年逾八旬諸子相繼歿幸身尙康健目覩諸孫成立其一復列膠庠嘆曰我生不辰歷數十載之艱辛惴惴焉如膺重負而不敢釋者爲汝先祖後也汝輩爲先祖後可不勉乎戊戌春正元夕膳飲依然氣偶喘吁溘然仙逝享年八十七歲旋膺旌表入節孝祠論曰世之青年婦女喪所天而苦節者多矣然或席豐履厚無家務累無凍餒憂節雖苦而境自甘猶不幸中之亦幸焉孺人以鸞孤鵠寡之身處鮒涸鴻嗷之境拮据萬狀憂鬱一生豈天之故爲薄視哉語云不

遇盤根錯節無以別利器松柏後凋歲寒乃見節義晚成家貧益顯乃知天之困之厄之苦之勞之適所以陰相之而玉成之也而孺人不可及矣

來里采訪  
來稿

有龍銀安妻苟氏州永里臨渡河人幼字銀安年十八

于歸二十九而寡遺一子二女家如懸磬每日勤勞工作僅給衣食女長適人食口雖減而所入亦復無多食用乃較前益窘子年十一捨以爲僧後受戒花巖寺苟辛苦異常遂憂鬱死年五十二

永里采訪  
來稿

有葉秀

臣妻馬氏州來里尖山場人年二十于歸甫六月而寡家徒四壁翁姑皆已就衰朝夕無以爲資去留一任其便馬特矢志奉親紡績爲壽久之翁姑繼逝馬葬畢卽歸依其父母曲盡孝道父母且喜且憐之欲令其改適無自苦馬不從出矢言乃聽之無何父母又卒其兄馬北海念終且無倚也卽謀爲立嗣而葉氏無宗族乃取姨夫周基坊子爲嗣更名載同時馬年六十矣堅貞一世辛苦半生所得僅此彼不知者方且以爲守此欲誰爲也而馬竟始終以之亦奇矣哉馬以宣統二年卒年六十一待旌

來里采訪  
來稿

有邱富吉妻吳氏州東城入年十九歸富吉四歲而寡遺一女苦不自給乃以針黹爲活僅供朝夕撫女成人嫁同城

合川縣志卷五十一 列女二

三十一

吳晉波爲妻幸有家矣甫十年而晉波死邱年甫二十七也吳氏故營鑼鼓小貿有弟名江字子純能屬文浪遊外出恃晉波爲主計晉波本擬迎吳來家未行而晉波死遺子一女四俱幼稚無人能舉其業遂停貿家益窮邱既不肯求人又六親同病告訴無門徒鬻賣什物典質衣飾能有幾何乃至對時而食以爲常然子女饑不能忍繞鄰索哺不能空言給勢不得已或暫賒一餅半餌給之以姑止其啼要非可以永朝夕也顧念覲顏向人不如自食其力猶幸幼從母習女紅工而且速因囑鄰佑爲領帽襪等工作日可得百餘錢以易薪米鹽菜差足果三四人腹得不餓死而邱氏久零落母飄泊無依既于心不安亦非計之得卽招母同居爲活計所入稍益豐衣食之餘漸及養教事久之子學貿成女並外適母吳以天年終壽七十五苦節五十九年矣邱見存年七十六守節四十九年有女適易德銓十六歲嫁二十三寡遺三子一女夫螟蛉兄某欲奪其產時凌逼之至日不再食吳亦忍不與較族眾不平爲鳴于官逐螟蛉兄而歸其產然亦所出無幾惟恃指頭生活撫子女俱成立今存已苦節三十五年

興里采訪  
來稿

若遇人不淑而因以成其

森楷案王  
氏譜嘉會  
為總兵應  
龍第三子  
派名亮禮  
字聯立張  
氏則進士  
衡猷之姑  
舉人乃孚  
祖姑也

節者則有舒壽亭妻譙氏州永里人歲貢開英之姪女也年十八歸壽亭姑及祖姑咸在譙事之無違禮堂上皆偁曰賢惟與壽亭不甚相中以壽亭父早卒無子母撫以承祧才四十日耳驕養過甚習與性成烟酒淫賭無所不癖因而而務恆業惟事浪費所入不給逋負綦多譙察知之微言諷諫不聽則正辭切規乃不免藥石成仇矣數歲祖姑逝世壽亭無忌憚任意妄行家資垂罄譙無可如何思以屍諫既就死爲家人救蘇則忍死徐待其寤無何壽亭病歸如有所悔譙盡心調理竟不痊以死時年甫三十也譙年如之自傷命薄無生人趣不如死之爲安因堅卧不食並勺水不入口者二十所日卒不死姑與族親並開說之仍責以棄親遺子于義無所取之大義乃銜哀治喪葬一切如禮葬後餘四十金以歸姑爲生死費已則晝爲人洗漿夜從事于縫紉鍼黹資以度日有贏仍以奉姑甘旨及爲子教養貲子遂藉以成立姑歿罄所有爲葬祭弔客觀者偁焉後以壽終

永里采訪  
員來稿

而既已立節乃憤子不才死非正命者則有熊代齡妻江氏壁山人笄年歸代齡于合州永里之十塘場夙興夜寐懋著勤勞三年而寡無子以兄子興懋嗣無何兄

合川縣志卷五十一 列女二

三十二

嫂繼逝喪葬盡禮遺有子女撫之一如興懋至成人婚嫁則新置產業二處略與原有者等蓋江勤勞節儉歲有蓄積婚喪雖費不能耗之以有此也清光緒末興懋高等小學校畢業例升中校江以事關進取不能異同但諄諄以保守家風爲囑而中校校長非人學風積壞與賭爲緣興懋所輸多罄其學食費給之猶不足至典衣物以償仍繼續有逋負遂相與爭競事聞爲校長斥去比歸江乃問得其實既恨不才又所失不貲謂有子如此無益有損將大加訓責或逐外以困難之興懋懼請痛改仍在鄉讀江無如何姑觀其後而興懋面從背違所賭負較前尤鉅江以爲終無幸也一夕雉經死年四十五守節二十三年其遇尤

可悲矣

永里采訪  
員來稿

其節孝萃于一門者則有王嘉會妻張氏合州人貢生我存女也生而溫恭淑慎靖靜莊嚴年十七歸嘉會又閱九年夫歿遺子三張養而教之長昶補州學生次書次春並舉人乾隆十二年知州宋錦爲請于朝得旌表門閭錦復爲之傳曰合陽節婦張氏故儒生王嘉會妻也歸王生婦道克脩居翁姑喪盡哀禮歲時祭享如生鄉里嘖嘖偁賢孝矣後



森楷案王  
氏譜作書  
妻杜氏生  
子國燦文  
生春妻龔  
氏生子國  
璋拔貢卽  
陝州州判

之王白瑜  
也白瑜子  
文煥恩貢  
生則書香  
不絕矣

九歲而寡今年近六十苦節清操歷三十餘載云王生歿時氏不欲生者數繼以孤幼罔所恃立乃節哀鍵戶謝親鄰獨居雖宗族非大故不相見其待諸孤也嚴正無姑息躬紡績以資膏火子三皆名立長昶茂才次書又次春並登鄉薦善讀書砥礪廉隅恂恂秩秩有儒者風蓋得之畫荻和丸者深故行修而名成也氏夫弟嘉德亦早喪氏兼撫其孤既長並其子遣就外傳今亦成立完婚偶矣是又不特克遂厥夫志克成厥子名抑且克廣厥夫愛焉丁卯予奉簡命牧是邦下車後郡屬搢紳及氏之族黨以狀聞予核其實為達諸憲援例請于朝明年詔旌其閭昶兄弟乞言于予予固樂道人善者也矧氏之潛德幽光尤炳炳者乎因援筆而為之傳烏虜金玉之質松柏之操固乾坤正氣所醞釀而成者也豈偶然哉豈偶然哉文出一時傳為佳話未幾書卒妻秦氏年二十七痛不欲生張勗以撫遺孤為己助秦乃止俄而昶春相繼物故一門孤孀形影相弔秦猶思惻張意亟勤力針黹縫紉通日夕無倦以為甘旨資姑歿年六十九秦竭力殮葬克慎厥終論者稱其能竟伯叔丈夫之志苦節三十九年卒年六十四

張乃孚州志

有陳至瑾妻何氏州人

合川縣志卷五十一

列女二

三十三

十九嫁二十三歲寡遺一子懋何立志守節歷五十二年而沒壽七十三懋妻龍氏年二十六遺孤光爵龍守之成立為復娶于何何至瑾妻之族姪孫也年十八歸光爵閱十歲光爵卒遺腹子泐何喜謂天不絕節孝後與姑龍共教養之乾隆末龍年七十二尚存守節四十六年何年五十一子泐後亦娶于李生子大倫而死李守節四十四年光緒初尚存同時有其族人陳光賢妻李氏光賢與光爵為弟兄行李適陳時年二十二又五年光賢卒無子撫從子佑為嗣苦節三十五年乾隆末年六十四存今又百餘年矣

張乃孚州志

有郭炳娘妻顏氏州西里沙魚橋人州舉人熙女也年十七于歸生子鴻梟二十而寡勤操家政罕與戚

黨見面人皆欽之二子既長為鴻娶母兄廷璋女十六于歸生子用成相興撫弄為樂裁一歲鴻卒乃與子婦共教養之後用成應道光十九年己亥恩科鄉試領解猶及見之卒年並八十餘

西里采訪員來稿

有杜如璵妻

苟氏州人年十七于歸事孀姑以孝聞踰歲如璵疾亟苟割股療之不肯苟節哀忍痛養育辛勤子亦成立守節三十六年卒嘉慶十七年奉旨旌表同時有杜如璵妻劉氏守節三十四年被旌其夫與如璵聯名

當爲兄若弟劉其苟之先後與

張乃孚合州志  
寇宗重慶府志

有伍茂吉妻楊氏州西

里龍市鎮人年二十于歸二十八而寡遺子世紳治家教子均有德度及世紳長娶于賴氏賴年十八事楊甚善楊嘉賞之謂其類已賴愈恭勤執事罔敢有懈生子子元甫離懷抱世紳遽死賴年方二十九也哀毀盡禮楊數慟諭乃復治事如初嘉慶中楊奉旨旌表旋沒賴獨撫孤兒心力交盡及長爲娶于柳柳亦賢孝事賴有加禮子元念母老不欲遠離有違色養柳力勸子元出讀堂上心志口體之養一切任之子元亦知其無虛語遂出游學後入邑庠姑賴嘗病幾危柳以爲非藥餌可瘳遽封股和藥進賴病豁然至六十八乃終奉旨旌表柳子凌霄同治丁卯科舉人凌漢廩生柳時猶健在也卒年六十有八奉旨旌表孝婦

西里采訪  
員投稿

有李錫麟妻池氏州永里南壩人錫麟父廷諤自有傳見鄉

賢池歸錫麟年甫及笄又五年錫麟卒遺子光藻光涵均幼池以家聲燕翼責在藐孤非但撫育即可塞責乃於噢咻之餘加以教督二子恪遵母訓惟日孜孜在學有聲乃各婚配光藻娶舉人周作孚女光涵亦論婚于世家佳兒佳婦式好無尤池于是始有家人之樂矣無何光藻

合川縣志卷五十一

列女二

三十四

卒無子周年十六慟欲身殉池諭之曰若死誠當但光藻長子誼不可以無嗣若在尙可議撫果死誰任此邪若名家子聞曾受女誡女史箴列女傳等于若父非不能深長思者可試孰計之周乃止旋爲撫光涵次子■兼桃以■已先出繼嫡堂伯母黃故也黃爲故安居舉人直隸新城縣知縣啟心女年十七歸錫麟兄錫蕃子光樞半年而寡池己以■嗣之至是無可再計乃雙桃焉未幾各舉一孫池始色然喜謂茂樹果無枯枝也光緒某年卒年七十五黃年七十六以光緒二十六年卒周卒于民國二年年六十三並以光緒■年予旌劍州訓導胡作藩爲撰一門三節碑立城南二十里之醉花園道左今存■兼桃孫嗣錫蕃者名清源光緒十二年娶妻曾氏十八年卒無子曾年二十三歸母家孀守今年五十苦節二十七年西里采訪  
唐尙賓來稿有陳謐妻譙氏州永里沙溪廟人年十六于歸二十九夫沒遺子大受未及三齡譙撫育教誨至于成立爲娶妻王氏文生王炳章之妹舉人王基峩之姑也年十七歸大受生子一道光五年大受病篤王無可爲計遂自刲股和羹以進大受食之良愈又三月乃卒王時年二十八與姑譙同撫

遺孤養教備至二十五年譙卒年七十有七咸豐中舉人周作孚北上為其姑婦請旌得旨雙旌義門并賜匾曰鳳髓麟脯人以爲榮○森楷案請旌

是彙題非專奏案照例不得賜匾且區文亦與旌表無關疑是族親祝壽者借款志慶而採訪者誤合爲一事耳今姑依原文光緒十

九年王卒年九十四守節六十六年員永里來稿有秦大恆妻吳氏州東

里人兄學優歲貢生吳幼讀書知大體及笄于歸生子鏡大恆歿年二

十九撫鏡成立爲娶于陳生子光裕甫彌月鏡旋卒陳年甫十八也吳

與共撫孤孫幸復成立襲業鹽商爲州聞人而陳歿矣年四十五奉旨

旌表入祠光緒初吳年八十二存亦予旌表誥封恭人又數年卒光裕

援例鹽運同銜光裕子德彝德修並州坵生德修後改名嘉澤報捐三

品銜湖北試用道與森楷善程業修合州志森楷坵有李子仁妻陳氏州東里獅

灘場人年十八于歸子仁五歲而孀遺三子皆孩提顧念前途悲來欲

絕姑蔡勉慰諭之陳卽矢志撫孤治家事如故未幾子仁弟子忠妻張

亦寡遺子懋亮甫周晬孤影無儔誓將身殉陳百端誘勸與同居張

乃不復作捐生想姑蔡聞而嘉之謂吾家不幸壯子繼亡此二賢婦行

坐相隨有如影響足慰桑榆况又辛苦作家爾宇大啟吾知門戶從此

合川縣志卷五十一 列女二

三十五

大矣久之陳三子皆授室實不能容乃與其兄弟析居陳得涼水井老宅張得半節大田則新置也歲時過從猶親密無間張亦爲懋亮取廩生林文安妹爲妻數年生子三皆知咳笑可提抱矣懋亮又死林年二十七耳張以憂過甚將老不治事林一身肩之外持門戶內教兒女備極辛勤仍敬事張不衰有大故猶稟商之張以壽終林視含殮營窀穸必誠必敬毋之有悔焉固以諸子成立已可告無罪于地下也無何次子德熙殤其聘妻林卽林姪也聞訃奔喪撫棺慟絕林以其年未及笄非能倉卒定嚮爲開諭以守志之難歷年之久事變之不可知未宜一意孤行不如歸去徐商所便女執謂母固姑也亦卽師也母能自立何疑兒乎必不見從有死而已林猶不忍遽許姑允終喪再議比及三年見其居處有則言笑不苟可以終其身也乃召親族告祖宗以長子子紹鑄繼林爲嗣林由是事親撫子居然作李家婦矣一門四節人無間言光緒十三年陳卒年八十二守節六十年舉人李乾祐爲赴部請旌表奉旨報可民國五年老林氏卒年七十八守節四十八年小林見存行年五十守貞三十餘年已抱孫矣猶足不踰闕非至親不得見其面云

東里采訪  
員來稿

有楊進曦妻鄧氏州西里福壽場人年十九于歸進曦生子忠濟夫故年二十五守志撫孤翁媪勤儉積蓄家因以起爲忠濟娶于黃已抱孫矣忠濟又死鄧憂傷憔悴以同治十二年卒年四十七黃生有至性尤耐勞苦忠濟歿時年甫二十六遺子厚棫尙幼撫今悼逝哭之甚哀姑鄧恐其過傷或生他變收涕慰諭甚至黃體姑意卽止不悲而衣袂枕簟閒未嘗不淚痕漸漬也已而鄧卒葬祭如禮然自大事以外初不浪費一文屬有屋當改作木石土匠一時麤集茶飯菜蔬非傭工一二人不能辦黃預爲籌備倉卒取給無或缺供烹飪之役負子躬任歷數月不告勞時以爲難居恆亦身自操作未嘗一刻休厚棫旣長娶妻某生子三女二黃謂可以息肩乃含飴弄孫不關家政頗足爲樂無何厚棫夫婦先後繼歿遺孤成羣伊優滿室黃無可奈何乃復理餘緒教養辛勤皆遂成立而黃心血爲枯雙目瞽矣見年七十有四對于其家務猶規畫井井不改常度孫及孫婦猶不敢不稟命而輒行也其能力可想見矣

西里采訪  
員來稿

有胡永眞妻韋氏州人年二十一而寡遺子紹先韋奉姑撫子恭執婦道未見紹先長成遽卒守節十有三年及紹

合川縣志卷五十一 列女二

三十六

先長娶妻趙氏年二十二紹先死無後趙以兄紹璠子爲嗣光緒初年四十六卒守節二十四年其同族同時又有胡永譽妻王氏教諭王志灼妹也年二十一夫故遺子紹紀王上事兩代翁姑下撫孤子孝慈兼盡光緒初年四十七卒守節二十六年

程業修  
合州志

有沈繼先妻唐氏州東里獅灘場人年二十歸沈氏以賢德著生子學山學富夫故年二十七

二子皆嬰孺也唐矢志孀守撫教孤雛以讀以耕皆能成立遂爲學山娶于周生子文彬爲學富娶唐氏生子文運姑婦祖孫一堂聚首融融洩洩其樂可知無何學山卒周年二十九逾年學富卒唐年三十僅餘二孫及衰姑五人對影淚血麻衣曩日甘雨和風此時愁云苦霧慘狀蓋有不勝言者旣已無可奈何則率勵二婦苦守諸孤茹淡食粗以養以教近二孫有成立之望老唐氏已年逾古稀矣用男子老傳之誼付家政于二婦俾各自爲計不復關之民國五年壽終年七十四周唐今並存

東里采訪  
員來稿

有周學柄妻唐氏州人寡居時年二十六遺子大邦大

德加意教養並能有立爲大邦娶于彭大德娶于于彭生子明春甫孩提大邦遽逝彭年二十九也哀痛欲絕唐慰諭之因相與共守孤雛冀得

大德先後提攜擴張先業未幾大德亦亡于年二十八獨明春長成爲取孫婦入門未久明春又死由是三世孤孀四人對影風雨如晦金石彌堅光緒初唐年八十二彭年六十二于年五十三並存其餘未聞

修合州志

有劉三義妻曹氏州興里人劉在合爲大族而支派繁衍不名一

家三義支人最寡之家亦不豐故未能齒于諸劉然固無害其獨立也道光十年曹適三義相與居貧無幾微見顏色又五年三義卒數月舉丈夫子一曰尙亨曹撫育之並養孀姑一無所資藉惟紡績或針黹供饗殮有不給則先飼老親以及孤子已僅餒其餘無則忍饑而已如是十所年劉氏一線之祀賴其苟延衰姑亦幸得亡恙咸豐六年爲尙亨娶婦曾曾故舊家女明大義事姑能得其心居室十年有孫二女孫一曹爲少慰曰劉氏今有後矣同治二年尙亨病遂不起曹以一家孤寡旣無伯叔終鮮兄弟伶仃孤苦情至難堪忽忽無生人趣曾慮姑憂念若此再有不幸支拄愈難乃忍淚節哀強顏開諭願舉養生送死之節飲食教誨之事一身任之不以仰累曹且慰且憐之仍黽勉同心操作不輟二孫成立亦各盡力所事一無乖違遂以和氣致祥百順爲福至

合川縣志卷五十一

列女二

三十七

光緒中曾出所蓄數千金買田于沙坪凡二百餘畝次子仁昭亦入邑庠居然小有富貴家矣今子孫繁衍或入學校或業農桑論者謂非曹曾苦節之遺不能致之曹卒于光緒十六年年八十一明年曾卒年五十六先後于同治二年光緒二十三年予旌如例

興里採訪員來稿

有張陸玉

妻楊氏州人年二十八寡居遺子維相苦守成立爲娶于鄒旣生子矣維相忽死鄒年甫三十也楊與共撫遺孤教養兼盡心血爲枯娶婦黃氏尙未抱子無何又歿于是張氏之祀斬矣黃痛泣呼天自言生不如死楊及鄒並開譬之旋撫其從子承祧黃意乃安光緒初楊年八十鄒年五十黃年三十並存今以舊志不詳所在地莫知其究竟矣

程業修合州志

森楷附記

有易肇檀妻劉氏州來里三角壩人文學張鵬翔爲其傳曰孺人

于歸時舅金鎰公已捐館舍奉其姑胡太孺人婦職克修咸豐十一年肇檀歿子光遠方五歲時流賊擾攘避亂城居孺人扶櫬歸葬封樹乃還遂主家政厚有望於光遠躬親撫養而督責綦嚴不以一子而稍縱故光遠旣成立大事必稟命而行猶時不免譴呵焉光緒十一年乙酉秋光遠妻曾氏卒孺人命厚葬之復爲娶劉氏卽孺人母家之姪女也

十三年胡太孺人年八十一疾弗起孺人臨窆大慟曰吾不幸黃鵠早寡與吾姑形相依影相隨未嘗一日暫離今已矣十八年劉氏又病卒更娶王氏孺人抱孫念切以光遠再娶再殯生子亦復不育嘗望空而禱以三事自責曰干天怒歟貽神羞歟結人怨歟皆未亡人之罪也願毋絕易氏後未幾王氏果占熊夢獲弄璋之慶光遠疾經年不愈孺人憂之延醫百里外卒無效於三十三年丁未卒孺人叩棺而呼之曰吾之茹苦含辛苟延殘喘者以汝故也汝死吾何以生爲弔者指幼孫慰藉之復泫然流涕曰強者不可保如此孩提者吾能待其成立耶蓋是時年已七十一矣然光遠未歿之先已爲之請旌於朝恩准建坊今去光遠之歿又越四年孺人尙康強無恙王氏亦頗能繼其志云易氏族譜有李懋極妻龍氏江北人年十七歸懋極于合之東里時李氏家門鼎盛自獅灘場至雙鳳場旁及大沔溪官渡財神巖小趕漕皆李氏國族所在環數十里田連阡陌無非屬李氏者龍亦江北望族內外富侈殆不期驕而君舅子鏗威姑姑張並處家儉素痛鋤奢汰惡習不令婦子家人染之張卽森楷從祖祖姑也龍三日入廚洗手奉事無幾微柔靡驕媚

態翁姑皆偁之曰賢光緒四年懋極歿龍年二十有八子德海德泳並幼德洸猶遺腹也龍慟念夙盟誓以身殉姑及嫂華委曲開譬乃茹痛節哀撫教子女一軌于正有丸熊坐鹿之風時人偁令母焉兄公懋樞字斗南督家政仍世儉嗇歲入雖豐各房支度有常限不得踰大閑而自筦州公事不能無酬應往往費用遂廣或說龍析居則用度裕而積蓄滋多龍以諸子未成立方賴伯父教誨謝不應後子皆授室懋樞自願分炊一聽所指授無于爭人以爲難光緒二十六年長子德海歿冢婦杜氏慟不欲生龍勸勉之守節撫孤一如龍故未久遺子病殤哀倍于喪夫龍使撫弟子德泳子爲嗣以安之無何季子德洸又死龍撫慰其妻陳一如杜由是一門三節弔影煢煢抱雪懷冰別有物外家人之樂而龍則亦旣吐棄塵凡皈心正覺日惟長齋繡佛以懺除世緣矣民國四年卒年六十有三杜陳並見存東里採訪員來稿森楷附記有熊國義妻何氏州人笄年于歸家貧已甚夫亦多疾何事奉不倦仍以針黹女紅助供饗殮國義偁之曰賢及國義歿年二十九遺子正賢養教成立爲娶于劉以賢淑聞正賢亦如其父多病劉侍奉湯藥不辭勞苦至何孀守之

年正賢適沒何恐其過哀開譬甚至劉體姑意乃忍苦茹痛襄理一切又欲爲何辦理棺衾以備不虞日夜勞苦因染重病劉知不起囑親族託姑後事未幾卒年四十三何旣丁此變仍勉竭心力內外支持並撫幼孫成人年八十卒守節五十一年程業修合州志有梁學樵妻丁氏州東里龍洞沱人父樹誠自有傳丁幼爲祖汝燾鍾愛教之識字少長讀書從父問大義父亦殷勤誨之遂以明章句知禮法聞嘗佐母理家政撫諸弟妹無缺失煩呵問父母皆以爲賢及年十八歸于梁氏親理中饋早作晏休奉事翁姑無違夫子在在悉遵婦道而姑特威嚴不易事丁委曲將順先意承志逐能得其歡心未嘗一逢怒也學樵自媿不如愈益攻苦遂以致疾自書院歸病已革丁侍奉湯藥不解衣者彌月夜則焚香禱天願以身代學樵卒不起丁時年二十八哭之甚哀葬祭如禮翁念其無子許以弟有子卽承嗣丁安俟之無何翁姑繼卒弟婦並年少不治事丁稽檢米鹽撐拄門戶無內外鉅細事悉一身肩之弟喜其能以所生子宗奎繼遵父遺命亦感丁賢能也丁撫子教女有父師之道今子已成立女長三四皆適人惟次女宗貞憫母劬勞守貞不字以養其母民國四年丁卒年五十七宗貞銜哀盡禮持齋諷經願以此終其身其北宮女嬰兒子之流亞與

至於旌表節孝之式尙可攷見者則有粟良周妻程氏州永里人歸良周時年十九良周旋入武庠生子一良周故程年方二十七矢志事姑撫子未幾子殤撫從子世乾爲嗣咸豐九年舉人周作孚等公呈請旌例當由本學起學正冉崇銘訓導吳廷珖爲看驗云事祖翁以暨孀姑孝養倍篤撫孤子而繼幼姪宗桃有傳知州孫嘉醇加看語云年十九而于歸越九載而喪偶冰霜自礪金石同堅繼姪撫孤心力兼盡知府李某加看語云立心守節族里憫其貞操履潔懷清端黨信其賢淑府以申本道本道轉布政司彙詳總督年終具題曾無有不准者蓋層節加攷致昭愼重無所于駁故也然其房費亦不貲矣大約每署數金約須三四十金云若由同鄉京官結呈禮部彙題則無上項手續第非公車北上或京官代請不可此窮家下戶所不能辦也歷來節孝人數不少泰半湮沒不彰者坐此今因采有看語特陳之以見其例亦專制之朝吏胥因緣爲奸此亦其一端爾方今罷去一切誠似便利特一人言之

据以爲信恐濫竽者正復不少當事亦嘗留意及此否乎

永里來稿森楷附訪員

記有康世昌妻鄧氏來里涇沱場人于歸世昌時年十九又九年而寡遺子元嘉躬養教之至十八歲而娶不久夭折乃撫從孫豐亨爲新婦承繼鄧撫幼孫事孀姑俯注仰承備極周到新婦意亦安之遂並以完節著光緒八年華國英知州事留意風教里人上其事曰爲闡揚節孝懇轉題旌事情某等戚隣節婦康鄧氏係農民鄧國才之季女故儒童康世昌之繼室也毓秀蓬門作嬪蘭室深閨待字十九載方詠桃天曲禮脩儀三百篇補陳榛筐侍孀姑于內寢影響奚如念老母而甯家聲情無改方冀瑟琴靜好永叶朱絃何期玉樹長埋獨留青冢痛所天之頓失願入地以相從而上有孀姑已逾六秩下遺幼子僅止三齡一瞶之死無難六尺之孤安托勉存視息不教黃口孤哀仍奉晨昏願解白頭憂懣于是以婦道代子職變慈母作嚴師養堂怡怡家人嗃嗃雖異團圞之樂猶餘肅睦之風不圖月不常圓花難長好讓草至七旬而萎梓木未二紀而殤再接再孫桐猶存竹祖卅■餘年之苦志金石同堅五十載之清操松筠並秀某等居同里閨誼托姻親仰芳躅于璇閨聞風起敬表幽光于金筦鎮日懷思是以循例公呈懇乞照轉倘荷褒榮泉壤貞心不泯其琳琅遂邀珍重輶軒大節永垂于竹帛匪惟一家之慶實屬一邑之光矚係天人感均存沒云云華爲照轉得旨予旌二十年卒年六十五請旌呈詞不工存此以見當時文牘體制亦一道也

來訪員

稿有曾憲鏞妻陳氏銅梁人歸合州曾憲鏞爲妻因爲州永里人入

門三月夫卒年未及二十七也其請旌公呈有云矢志柏舟心堅金石孝事姑嫜摯豈僅修乎棗栗和待妯娌粧早已謝其鉛華撫子慶陽承桃雖怨黃鴻以失雙猶哺青雛而如一迄今子又生兒宛爾珠聯璧合在昔母猶乎父居然歐荻柳丸云云雖無事實其概略可見也民國四年卒年五十一苦節三十二年例符旌表

永里來稿森楷附訪員



補遺

劉澤厚妻楊氏州東里三滙壩人幼失母能自立事繼母以孝聞年十七歸澤厚善事姑吳姑偁之曰賢同治十三年澤厚卒楊年始十九無子痛欲身殉姑爲撫從女桂香以慰之光緒九年兄子槐森生二歲立以承嗣楊恩勤顧復有如所生少長則教以義方並桂香皆略使習勞不令養成嬌惰之性每家塾課暇歸則問本日所讀能孰誦否少閒則命桂香作鍼黹槐森赴近山樵采或學習樹藝並灌漑蔬圃勿致廢日嬉遊或以槐森體羸不宜過勞爲言輒舉敬姜瘠善沃淫之旨以答且謂此爲鍛鍊身體衛生卻病第一要義非慣怙安逸妄服藥餌者所可幾及也言者乃止自是習以爲常子女皆安之若素而槐森病瘳轉益強因顧謂槐森曰此勞則思善之效也先民有言我豈妄哉以後惟當奉書要苦讀田要勤耕八字爲要訣耳書固宜讀農亦不可不務若不問生產專意求學一旦硯田不孰饗殮無繼一身凍餒尙可不恤如尊幼事畜何固不能不慎之于始也槐森奉其言終身不忘故近雖投身政學界中而仍以實業爲亟本楊教也十七年與兄公析炊頗有逋負

合川縣志卷五十一 列女二

四十一

楊居積數載盡償債務仍致千金二十一年病卒時槐森年十四方就外傳聞病劇亟歸楊已不起泣執槐森手曰而家世書香而讀書性又較敏予苦節二十餘年無他望惟盼而成名顯揚耳今已矣好自爲之勿令後人笑我拙也言訖而逝此槐森所爲追述母德而亟稱先妣自孀守後卽患肝氣病飲食減少日率一餐或閒日一餐重愛惜醫藥費不常治理病稍益增加始延醫診視服藥一二劑中病輒止不肯服善後培補諸方槐森亦侗愚無知未能殷勤勸進使病根盡去徒聽先妣以田租所入爲子女衣食婚嫁之資備公義慈善之用而初不以已病爲意以至十餘年來病終未已一病遂不能起曾未仰酬劬勞于萬一爲終天抱憾無窮也槐森于森楷筦學務時考入本州初級師範學校旋升入通省優級師範學校宣統二年以楊事實屬德陽賀吉士維翰呈請禮部彙題旌表得旨報可槐森歷任本州勸學中校校長現充國民黨理事長四川鐵路順渝清算員

劉槐森投稿  
森楷附記

涪文炤妻黃氏州城內人生穎敏內則女誠諸篇略能上口年十九歸文炤雞鳴警旦鴻按相莊有古賢夫婦遺意文炤旋入州庠力謀進取

蘭之質詩歌宜室早諧琴瑟之聲舉鴻案於房中齊睂致敬折鳳釵於  
頭上比翼旋分憤不獨生願魂魄相依泉壤義何敢死有繼姑更抱孤  
兒念高堂已近百年賴承甘旨爲宗祀僅延一線尙待提攜愉色對親  
暗濕枕邊之淚義方訓子稍酬地下之心安貧而紡績忘勞同鄉稱不  
櫛士至老而鉛膏不近此生是未亾人屈指光陰閱星霜者五十八載  
堅心鐵石守貞靜者二十九年賢聲旣著鄉鄰苦節尤符年例是以紳  
等具呈公舉懇祈據實轉詳俾巾幗沾榮得揚輝於梓里風徽遠著不  
垂式於蘭閨事聞予旌如例

師竹軒集

補遺

鄧宗鎮妻秦氏興里桐子園人年十四以教匪亂草草成禮連舉丈夫子三宗鎮卒年二十九撫孤教子皆克成立孀守二十八年道光十九年卒二十五年請旨旌表又三年舉人王基峩銘其墓并序之曰百尺松高歷嚴霜而逾翠千竿竹勁因漬淚以成斑故之死靡他柏舟誌詠所天不二彤管流輝惟節目之堪尋實貞心之可表惟我鄧太姻母秦孺人明姿玉潔雅度山安三從推尹姑之宗四德秉姬姜之教特以命實不猶生逢多難縈將結候滿目烽烟聘始成時驚心板蕩當是時孺人實生甫十四云當夫見廟而還常作持門之健桓車對挽萊畚同操創門庭於櫛沐之餘全細弱於化離之會靈萱半畝藝在堂前寶樹三株森於砌畔無何青天恨滿分飛比翼之禽碧海愁多忽斷連絲之藕蓋于歸十餘年而我親翁宗鎮公已仙遊矣孺人則悲思石化痛欲城頽面罕人窺心惟自誓文鸞影破終無對鏡之期寶鴨香消永絕薰爐之日是則歌傳寡鵠氣已頽唐曲譜將雛聲皆激楚者矣何璇源之告竭竟婺彩之終沈以道光十餘年卒於樟梓園之里第春秋五十有七

合川縣志卷五十一 列女二

四十三

是孺人之稱未亡人也方二十九歲其撫諸孤子也歷二十八年家原馮進士遺居碩彥休風丕著宅近鄒翰林故里忠臣大節同昭有子三人長君早世而季子興相興桐方龍文之挺秀諸孫德清德俊更驥種之鍾奇旋於道光二十餘年請旨旌表建立總坊勁節凌雲喜見龍章寵錫恩綸煥日欣看鳳誥褒嘉茲者穴卜牛眠封崇馬鬣勒貞珉而不朽彤管揚芬卜奕葉之方昌黃泉可慰福人福地佳水佳山爲賢母敬綴蕪詞幸鄙人能知梗畧是爲序并製銘曰天生邦媛獨著風規爲巾幗式作女中師柔嘉習禮婉婉敦詩身歸閨閣手創門楣鍾型宛在郝法無虧春風試翦夜月繅絲良人忽逝薄命堪悲哀惟飲血痛欲磨笄姑哀待盡子幼無知風淒內寢月冷空闈懷同雪鑑面不朱施星霜幾閱節義孤持謀深燕翼慶衍螽斯欣逢泰運特表坤儀幽光勃發大節昭垂登賢母傳繫後人思追維懿範永豎豐碑箕裘丕振福祿攸宜於

今爲烈振古如茲

興里採訪員  
文仁山投稿

余光福妻孔氏東里石龍場人父廣濟孔庶奉祀生饒于財初字余時家相當也及笄余氏中落廣濟慮不愜其意怨且起使人微風示之乃

以重慶書院人才所萃負笈往遊攻苦綦至歲餘聞母喪歸哀毀滅性而卒黃年始二十二再遭大故痛不欲生顧念衰翁在堂遺孤光祿及二女並幼不能不忍死事畜以盡未亡人天職乃節哀順變上慰阿翁下撫嬰孺心力交瘁教養兼施卒得終養天年願了婚嫁至同治初壽終守節三十餘年年五十餘先其翁健在時憫陳孀苦許以例合旌表之年卽爲請旨建坊比黃之歿翁已先卒子光祿弗克負荷竟未上聞族親滄光裕黃錫爵等恐遂終歸湮沒末由彰顯乃議摘祖遺思居鋪街房三間爲陳夫婦祠宇及旌坊之用同治十二年思居鋪火比鄰灰燼獨所存房無恙論者皆謂天憐節孝鬼神實呵護之遂公呈州官請予立案保墓永不當賣光緒六年特立節孝碑于道周以誌碑爲周之藩作敘述尢襍無法爲節存之如此

周之藩  
節孝碑誌

謝天培妻陳氏州城內人少讀書通大義十七歸天培生一子又十年而寡子尙髫髻也陳教養兼至聞父執張乃孚覓屋未得慨然以廡賃之數年乃孚諗其賢爲五言古詩贈之曰陳宗有賢媛蘭閨自鍾毓幼習內則篇女箴次第讀十七歸謝郎中道賦寡鵠遺兒太零丁齟齬勞

合川縣志卷五十一 列女二

四十四

顧復母也實兼師詩書勤以勗苟有不率教鞭撲繼之哭教子如此嚴成名或應速近託伯通庶節操欽靜肅我呼女伯鸞品題定不俗而父曾締盟視之吾女屬吾母倚門閭慰詞解顰蹙曰時勞餽遺朝昏問寒燠情義直兼到不啻骨肉族心性夙聰慧溫和秉嘉淑才不擅銘椒德堪彤管續慮事詳且明嫺黨無抵觸如斯巾幗人目中見亦獨懿行愧鬚眉闔言眾所服世風日趨下四德久不復處富太驕矜處貧又蹣跚姑婦多勃谿妯娌爭角逐惟播詬誶聲那見家室睦聞此當自慚閨中繡幾幅我作歌表揚以待輜軒錄時乃孚志成已久故不及載入而望後來之表彰之也程業修續志亦僅載其名不錄其事則黯淡無顏色矣今特爲表出焉

問濱餘草續  
編森楷附記

吳開詡妻梅氏州人道光中歸開詡未久而寡至咸豐初守節二十九年例得旌表進士朱奂爲領銜公舉其詞云竊惟婦德難求節義居言容之首貞風遠播激揚實觀感之由垂遺範於千秋篇名列女望高臺之百尺地接懷清萬世下同仰芳徽十室中亦存古道苟能冰霜自厲宜使姓氏表彰茲有合州故監生吳開詡之妻梅氏秀毓香閨自具蕙

坦然無幾微見詞色則大喜許加百金媵焉且予之券孔初不介意比至有行一切如平日而事舅姑祖姑有加禮余氏亦宜之同治初元光福歿遺子高詠宗元幼重親老且衰家不給于養孔亦僅年二十七未能如健婦持門英英露爽也或以諷夏侯令女者諷焉孔矢志侃侃且言夫子不幸卽子道父道皆未亡人一身肩之其能諉諸異人任哉雖少不更事固當勉竭心力爲其所得爲盡其所能盡使死者復生生者不媿而已其它非所知也由是于事畜外兼理家政焦勞日夜積有歲年偶遭死喪愼終有禮度支罔繼稍以拮据時二子皆已成童特遣宗元往詢外氏媵金之數不得要領而還孔言阿耶一去若輩將食言矣是非操券責之不可然無庸也而兄弟克肖雖致萬金無難如其不然固有田連阡陌一簪不得著身者是在人自爲耳區區媵嫁百金何足爭乎吾安貧已久更三五年節衣縮食盡彌此隙可也語已執券焚之命宗元改事農耕聽高詠讀如故每花晨日夕書聲紡車聲襍以田歌樂融融也後高詠入邑庠猶指身上之衣爲母手中之線並昔今脩脯費亦母十指尖出之卒年五十二高詠今存

東里採訪員吳庶績投稿

合川縣志卷五十一

列女

四十五

周成梁妻劉氏巴縣人年二十適成梁于縣東里之草街子爲人耐勤苦安儉素灌園飼豬炊爨浣濯皆必親操而紡績縫紉鍼黹女紅亦所不廢唯不喜艷粧華飾終身不御綢帛金玉之玩好初不著手亦不赴遠近酒筵則貞靜其天性也成梁以是賢而敬之旣生子鏡波及女三彌自勤劬曾不告勞無何成梁卒劉年二十九益勵艱貞會鏡波出痘危篤幾不保久乃獲安而同居之堂叔某忽以痘死叔家以謂起由鏡波大相詰碎劉無可置辨唯吞聲飲泣而已旋請析居美田嘉屋悉讓于夫弟成棟而自取其苦窳者仍獨任重親養葬費終其身無怨言然盡力支持不失舊物且有加于前則勤儉之效矣光緒二十四年鏡波入合州學不逞者謂其本州無學籍而田廬多在江化之二岩指爲冒籍將攻之鏡波念非有所捐助不可而恐劉不允亟遣人歸請命劉慨然捐助學田銀二百兩旣息目前風潮且爲異日領鄉試賓興費及爲子孫續考地論者以爲能見其大非尋常巾幗可及也及鏡波堂備不售遽歸奉母不復以官學爲意劉尤慰安之晚年訓誡後輩特諄諄于因果報應而以忍讓惜福爲歸聞者多悅服焉晚年多病杖而後能行

鏡波侍養無方心爲之□俄而增劇以民國八年七月卒年七十六鏡波私謚之爲守性鏡波字綱模今存周鏡波來稿

熊延銘妻印氏璧山縣人年及笄歸延銘相敬如賓延銘外貿處翁姑娣姒姊妹間曲盡其道延銘無內顧憂及卒遺女才數歲子僅數日耳印慟哭不欲生或告以婦于夫歿當以事親教子爲節若徒殉夫而置親與子弗顧非善之善也印意乃解俄而子又殤印遂決計捐生有諭慰之印曰夫死撫姑禮也孤旣歿將焉守老姑雖衰有叔姒在■我何久留爲其夫弟延瑞聞之遽曰侄承祧亦可胡遽爾異日長子生當以嗣子謂予不信天實鑒焉印迺改容謝閱五載延瑞子明第生卽以爲嗣明第幼多疾輒劇印爲數日不食寢焚香告天祈以身代其懇摯悽惋之情有爲人所不忍聞見者少長就外傳教督備至不以獨子寬有古和丸畫荻風而不欲以夏楚威有違教則反覆誥誡務期于感發而後已否則涕泣苦語痛不可止卒得率訓如初後以父死哀毀卒年四十餘子明第州學生

巴縣舉人曾光棟印太孺人傳

施體庵妻梁氏東里龍洞沱人其族子施運業爲其行略曰孺人生清

合川縣志卷五十一 列女二

四十六

咸豐乙卯年十六歸族伯體庵府君府君初欲呂讀書顯世妻屈僮子試隱于醫年三十呂卒於時孺人年二十九遺孤三大者十歲六歲小才數月家故無孳儲之資人咸憚其難爲矣孺人顧毅然持門戶呂撫孤自任治作女紅爲生服食雖儉遣子弟讀書未嘗閒輟卒教三子成人皆善賈而書畫百技一寓目輒模之畢肖人謂施氏子弟無頑魯者蓋呂此二人也鄉業幼時嘗隨先妣詣伯母家見責提運宣兄甚厲畏怖欲泣旣迺知孺人之教嚴呂素雖鄰近兒女子夾見之加敬不敢少肆矣孺人今年六十有四清宣兩兄夾抱子呂服賈累鉅資孝養克無愧唯未有以彰孺人之績也呂委業命紀其行業不肖不能有呂爲先人光旣幸孺人勝節克榮我族世敢不忘之目爲來者勗其文頗簡潔問之里人僉曰其事信因具錄之

施運業族伯母梁孺人行略